



7(724)

2026

Հրատարակվում է
1999թ. սեպտեմբերից

Лусарар •

Հանաչել զիմաստություն եւ զխրատ, իմանալ զբանս հանճարոյ

ԿՐԹԱՄՇԱԿՈՒԹԱՅԻՆ ԹԵՐԹ

• Lusarar

ԱՐՑԱՄԻ ԲԱԼԻԿՆԵՐԸ ՀՐԱՄԱՅՈՒՄ ԵՆ

Արցախ, իմ սիրտ, քեզ սիրում եմ,
Քեզանով շնչում եմ ես:

Երևանում արդեն գործում է «Արցախի բալիկներ» մանկապատանեկան համույթը, որը վերածնվել է Մոսկվայում գործող «Դիալոգ» հասարակական կազմակերպության աջակցությամբ: Հունիսի 30-ին Երևանի Հովի. Թու-մանյանի անվան ազգային տիկնիկային թատրոնի դահլիճում հանդիսատեսները, որ հիմնականում արցախցիներ էին, ըմբռնվեցին «Արցախի բալիկներ» համույթի հերթական համերգը: «Ձոն Արցախին» խորագիրն էր կրում Գայանե Հարությունյանի ղեկավարությամբ գործող մանկապատանեկան համույթի համերգը: Այս անգամ ևս արցախցի մանուկները հանդիսատեսին ոգևորեցին, հուզեցին, ստիպեցին արտասվել և վերջապես՝ դարձյալ մտածել տունդարձի մասին:

Բեմը ձևավորված էր արցախցի գյուղացու հիմնական գործիքներով՝ խնոցի, արկանք, սալա և այլն: Ծրագրում ընդգրկված էին արցախյան ազգագրական սիրված այնպիսի երգեր, ինչպիսին են՝ «Ձոն Արցախին», «Ղարաբաղի բալիկներ», «Շուշվա կեղը», «Տմբալաչի խաչան», «Վեր կաց, եղբայր իմ», «Ո՛ւր եք, տղաներ», «Պիտի ապրենք» և այլ երգեր՝ պարային կատարումների և թատերականացված ասմունքի, արցախյան բանահյուսության ու-

ղեկցությամբ: Համերգն սկսվեց արցախյան երանելի օրերի պատմությամբ. թոռնիկները հյուր էին գնացել Դեդո-Բաբոյին, ու պարզ է Բաբոյի ուրախությունը: Բաբոյի օգնությամբ նկարեցին իրենց տունը:

Յուրաքանչյուր կատարում ստիպում էր հանդիսատեսին ծափողջուններով հայտնել շնորհակալություն Արցախում ծնված, սակայն այսօր հայրենի ծննդավայրից 2023-ին բռնի հեռացած երեխաներին: 2020 թվականի սեպտեմբերի 27-ին սկսված 44-օրյա պատերազմից հետո շատ բան փոխվեց աշխարհի ամենաազատ Արցախ աշխարհում: Նույն երեխաները և նրանց հասակակից հազարավոր արցախցի բալիկներ մեկ տարուց ավելի մնացին չջրափակված մեջ, տեսան սով ու ամենաահավոր՝ շարունակվող պատերազմ:

Նրանց գլխավերևում թշնամու արծակած արկերն են անցել, պայթել աչքի առջև: Եղավ նաև բռնի տեղահանությունը, որ տեղե մի քանի ծանր ու մղձավանջային օրեր: Եվ

«Արցախի բալիկներ» մանկապատանեկան համույթը կազմավորվել է 1989 թվականին՝ Սերգեյ Հարությունյանի ջանքերով: Գայանե Հարությունյանը 1998-ից համույթի խմբավարն էր, 2008-ին նշանակվել է գեղարվեստական ղեկավար: Բռնի տեղահանությունից հետո եղավ հանդիպում «Դիալոգ»-ի հիմնադիր-նախագահ Յուրի Նավոյանի հետ, որից հետո համույթը շարունակեց իր գործունեությունը արդեն Երևանում: Հունիսի 30-ի հա-



այս ամենը տեսած երեխաները երգեցին «Ղարաբաղի բալիկներն ենք» երգը: Այսօր դարձյալ միասին են համույթի երեխաները՝ սիրելի գեղարվեստական ղեկավարի՝ Գայանե Հարությունյանի գլխավորությամբ: Միասին են ու միշտ կատարելագործում են իրենց տաղանդը, շնորհքը: Մեծ ոգևորությամբ կատարեցին Հայոց Այբուբենը:

Արարիչ Բովանդակ Գոյության Դատավոր Երկնային Զորավոր Էություն...



ՄԵՆԵ ԵՆԵ ՄԵՐ ՍԱՐԵՐԸ



ԵՎԱ ՂԱՆԻԵԼՅԱՆ, 11 տ.

առավել են կարոտում հայրենի տանը», - ասաց Ի. Թամրազյանը, որը երկար տարիներ աշխատում է երեխաների հետ ու լավ է ճանաչում նրանց հոգեբանությունը: «Արցախի բալիկներ» համույթի գեղարվեստական ղեկավար Գ. Հարությունյանը տեղեկացրեց՝ համերգին հրավիրել էին երեխաների առողջության և զարգացման կենտրոն ՀԿ-ի «Արև-երեխաներ» և Արցախի թեմի կիրակնօրյա դպրոցի երեխաները:

ԴԵՊԻ «ԱՐԱԳԱՆ» ՃԱՄԲԱՐ

Երևանում գործող «Թեքեյան Կենտրոն» հիմնադրամը մշտապես եղել է Արցախի աջակիցը: 2020-2023թթ. Արցախում տեղի ունեցած ողբերգական դեպքերի ու արցախցիների բռնի տեղահանությունից հետո «Թեքեյան Կենտրոն»-ն առավել սկսեց աջակցել մեր հայրենակիցներին: «Թեքեյան Կենտրոն»-ը նաև աջակցում է ՀՀ-ում՝ Երևանում, Ստեփանավանում, Կարբիում և Գյումրիում գործող Վահան Թեքեյանի անվան դպրոցներին: Արցախի Քաշաթաղի շրջկենտրոն Բերձորի թիվ 1 միջնակարգը նույնպես կրում էր մեծ գրողի անունը, և թեքեյանականները մշտապես աջակցում էին այդ կրթօջախին: «Թեքեյան Կենտրոն»-ը յուրաքանչյուր տարի կազմակերպում էր նաև Թեքեյանական օլիմպիադա՝ նշված 5 կրթօջախների 8-րդ դասարանցիների մասնակցությամբ: Այդ կրթական միջոցառումը վերածվում էր մեծ տոնի: Օլիմպիադայի հանձնախմբի կազմում ընդգրկված էին մեր ժողովրդի կողմից սիրված ու ճանաչված մտավորականներ՝ գրողներ, դերասաններ (Վարդուհի Վարդերեսյան, Գուժ Մանուկյան), դասախոսներ: «Թեքեյան Կենտրոն» հիմնադրամը 2010 թվականից իրականացնում է նաև «Ամառային ճամբար» ամենամյա ծրագիրը: Այն հնարավորություն է ընձեռում երեխաներին իրենց ամառային հանգիստն անցկացնել մեր հայրենիքի գեղատեսիլ վայրերում, դառնալու ինքնուրույն և ինքնավստահ: Եղավ նաև ցավալիք. 2020թ. կորոնավիրու-

սի համավարակի և 44-օրյա պատերազմի պատճառով ծրագիրն ընդհատվեց: Սակայն «Թեքեյան Կենտրոն»-ը, տնօրեն Արմեն Ծուլիկյանի գլխավորությամբ, պատերազմի օրերին, դրանից հետո էլ մշտապես իր ծրագրերում արցախցիներին ընդգրկում էր: Կենտրոնի դահլիճում կազմակերպվում էին հանդիպումներ տեղահանված արցախցիների հետ, իրականացվում էին տարբեր ծրագրեր՝ հումանիտար, կրթական, մշակութային: Այս տարի «Թեքեյան Կենտրոն» հիմնադրամը կրկին իրականացնում է «Ամառային ճամբար» ծրագիրը՝ այս անգամ ընդգրկելով Արցախից բռնի տեղահանված երեխաներին:

Ծրագրի շահառուները՝ «Արցախի արվեստագործների միություն» ՀԿ 32 սաներն ու մանկավարժները, որոնք Ստեփանակերտից, Մարտակերտից, Հաղուրթից են, Հաղուրթի մանկապատանեկան ստեղծագործական կենտրոնի տնօրեն Իրա Թամրազյանի ղեկավարությամբ, իրենց յոթօրյա ամառային հանգիստը կանցկացնեն Սեդրաձորի «Արագած» ճամբարում:



Հուլիսի 25-ին ճամբարականները, նրանց ծնողները հավաքվել էին «Թեքեյան Կենտրոն»-ի մոտ: Նրանց դիմավորեց կենտրոնի ներկայացուցիչ Սեդա Խաչատուրյանը, հակիրճ ներկայացրեց իրենց կառույցի մասին՝ կարևորելով «Ամառային ճամբար» ծրագիրը: Ասաց. «Ծրագիրը նաև մեծապես նպաստում է մեր երկրի տարբեր անկյուններում բնակվող երեխաների մերձեցմանը,

նրանց բազմակողմանի զարգացմանը մտավոր, հոգևոր, մշակութային գիտակցության, ֆիզիկական առումներով: Տարատեսակ մտավոր և ժամանցային խաղերի, մարզական, մշակութային միջոցառումներով, ազգային երգ ու պարի ուսուցման, հիշարժան վայրերի այցելության շնորհիվ երեխաների ամառային հանգիստը դառնում է առավել բովանդակալի ու հետաքրքիր: Ճամբարը զարգացնում է անհատականությունը, պարզաբանում ամոռաճանաչի պահեր: Ընդհանրապես «Ամառային ճամբար» ծրագրում ընդգրկվել է շուրջ 720 շահառու Հայաստանից և Արցախից՝ մասնավորա-

պես 10-14 տարեկան զերազանց առաջադիմություն ունեցող, սոցիալապես անապահով և բազմազավակ ընտանիքների երեխաներ: Ճամբարականների հետ ուղևորվեցի Սեդրաձոր: Բարձր տրամադրություն էր տիրում ավտոբուսում: Ճամբարում, տնօրեն Անդրանիկ Բաբայանի գլխավորությամբ, արցախցիներին դիմավորեցին մեծ խանդավառությամբ: Սկզբում խմբով լուսանկարվեցին: Ա. Բաբայանը ծանոթացավ երեխաների նրանց, ղեկավարի ու կամավոր ջոկատավար Ամենուհի Ալեքսանյանի հետ, որը ծնվել է Հաղուրթում: Ճամբարականների խմբում է նաև Ամենուհիայի քույրը՝ Նինան, որը ցանկանում է դերասանուհի դառնալ: Հուլիսի 1-ին Հովի. Թումանյանի անվան տիկնիկային ազգային թատրոնի բեմում տեղի ունեցավ Կարինե Քոչարյանի «Սարից այն կողմ» պիեսի բեմականացումը: Գլխավոր դերերից մեկում Նինան էր: Ընթացքում որոշեցին հետագա ճամբարի ջոկատավարների ուղեկցությամբ արցախցի երեխաները տեղավորվեցին իրենց սենյակներում: Հիշեցի՝ 2017-ին նույն ճամբար ուղեկցել էի նաև բերձորցի աշակերտներին: Ճամբարի տնօրենը տեղեկացրեց՝ շատ է եղել Արցախում, չըբել է շատ բնակավայրերում: Հարցին՝ կազմակերպվելու՞ են արշավներ տեսարժան ու պատմամշակութային վայրեր, Ա. Բաբայանն ասաց՝ անպայման:

Ջոհրաբ ԸՈՔՈՅԱՆ

ՇՐՋԱԳԱՅՈՒԹՅՈՒՆ

ԹՈՒՄԱՆՅԱՆԻ ՈՏՆԱՂԵՏՔԵՐՈՎ

ԷՆ Լոռու ծորն է, ուր հանդիպակաց ժայռերը՝ խորունկ նոթերը կիտած՝
Դեն ու դեն կանգնած, համառ ու անթարթ
Հայացքով իրար նայում են հանդարտ:
Նրանց աչքերում՝ զազազած զալի՝
Գալարվում է գիժ Դև-Քեղը մոլի,
Խելագար թռչում քարերի զըխտով,
Թըրփուր է թըքում անզուսպ երախով,
Թըքում ու զարկում ժեռուտ ափերին,
Փընտրում է ծաղկած ափերը հիմ-հիմ,
Ու գոռում գիժ-գիժ.
-Վաշ-վիշշ, վաշ-վիշշ...

Հովհ.Թումանյան

Թերևս այլ համապարփակ, տիպիկ նկարագիր Լոռվա չքնաղ բնաշխարհի մասին լինել չէր կարող: Սա ոչ թե մարդկային հզոր երևակայության արգասիք է, այլ աստվածաշնորհ մի պարզև, որն առավել կենդանի ու խոսուն է, ինչպես այդտեղ ապրող մարդը: Մարդն ու բնությունն այստեղ մի հրաշալի ներդաշնակություն են կազմում՝ միմյանց հարազատ ու միշտ իրար լրացնող: Այս աշխարհում հայտնված մարդը ականա դառնում է նրա մի մասնիկը՝ նույնքան պարզ ու բյուրեղյա, նույնքան անխառն ու անարատ...

Երբ ոտք ես դնում այս գողտրիկ աշխարհ, քեզ ընդառաջ են գալիս Մեծ Լոռեցու անմահ հերոսները՝ փոքրիկ Մարոն՝ իր մեծ ողբերգությամբ, Անուշը՝ իր չվայելած սիրով, Գիթորը՝ իր խեղճ ու անմեղ հայացքով, Համբոն՝ Գիթորի շորերը շալակած տուն դառնալիս, Քաջ Նազարը՝ «անհաղթ հերոսի» դրոշակը ձեռքին, Բարեկենդանը՝ բրինձն ու յուղը շալակած, Չախորդ Փանոսը՝ իր ծախորդություններով, Շուկն ու Կատուն՝ իրենց խոր անհաշտությամբ, Լոռեցի Սաքոն՝ իր հսկա կերպարանքով, Ծերունին՝ իր ծանր հառաչանքով... Հարյուրավոր հերոսներ, որ ապրել, ապրում են ու շարունակելու են ապրել հանճարեղ Թումանյանի հետ: Հրաշք բնությունն ինքն է խոսում քեզ հետ՝ չսպասելով քո միջամտությանը: Հնարավոր չէր այս հրաշագեղ բնության գրկում երգիչ կամ բանաստեղծ, նկարիչ կամ բանահավաք չդառնալ: Ամեն մի գողտրիկ անկյուն, մի ավանդազրույց, մի հերոսապատում, մի լեզենդ, մի հեքիաթ ու մի զարմանահրաշ պատմություն ունի ծրարած իր խորքերում: Պատահական չեն ծնվել այս խոսքերը Թումանյանի հոգում.

Ամեն անգամ Քո տըվածից երբ մի բան ես Դու տանում,
Ամեն անգամ, երբ նայում եմ, թե ինչքա՛ն է դեռ մընում,
Չարմանում եմ, թե, ո՛վ Շռայլ, ինչքան շատ ես տըվել ինձ,
Ինչքա՛ն շատ եմ դեռ Քեզ տալու, որ միանանք մենք նորից:

Այս խորախորհուրդ ակունքներից է սնվել հանճարեղ Լոռեցին՝ դարերում հավերժանալով իր անմահ գործերով:

«Արարատյան արժեքների կրթական հիմնադրամի» կազմակերպած հայրենաճանաչողական շրջագայությունն ուներ հետևյալ օրակարգը.

1. Կանգառ Ապարանի ջրամբարի մոտ. այցելություն 5-րդ դարում կառուցված Սբ Վարդան և ջրամբարում մնացած Սբ Պողոս-Պետրոս եկեղեցիներ.
2. Կանգառ Դսեղի «Քարե սնկերի» մոտ. դիտարան, որտեղից բացվում են Լոռվա աշխարհի հրաշք տեսարանները, և որտեղ նստել ու ստեղծագործել է Հովհ. Թումանյանը.
3. Այցելություն Դսեղի Հովհ. Թումանյանի տուն-թանգարան.
4. Այցելություն Դսեղի «Ծովեր» լիճ և հրաշք տեսարանների վայելում: Թումանյանի ստեղծագործությունների ունկնդրում.
5. Վերադարձ:
Վայելելով ճանապարհին մեզ հանդիպող չքնաղ տեսարանները, որից հնարա-

վոր չէր կտրվել (հայացքով ուղեկցում էինք մինչև տեսադաշտից հեռանալը)՝ խումբը կանգ առավ Ապարանի ջրամբարի մոտ: Հայացքը իսկույն շոյում են թավ անտառներն ու ծաղկազարդ դաշտերը. ասես մի անտես նկարիչ է վրձնել այդ գեղեցկությունը՝ այցելուներին ավելի ևս գրավելու և բնությանը ծուլելու համար:

Հիմնադրամի խորհրդի նախագահ Նաիրի Հովսիկյանը այստեղ ծանոթացրեց պահպանված հուշարձաններին: Սբ Վարդան եկեղեցին կառուցվել է 5-րդ դարում՝ Վարդան Մամիկոնյանի պատվին: Պահպանվել են խաչքարեր և մի դամբարան, որը կառուցվել է 451 թվականին տեղի ունեցած Ավարայրի ճակատամարտի նահատակների հիշատակին: Ամենատպալուրիչը ջրամբարի մեջ հայտնված Սբ Պողոս-Պետրոս բազիլիկ եկեղեցին էր, որն անվանում են նաև ջրի տակ անցնող և դուրս եկող եկեղեցի: Այն կառուցվել է Ապարանի ջրամբարի ծախս ավին 5-րդ դարի առաջին կեսին: Հաճախ ջուրը ծածկում է այն, բայց պատի վրա գտնվող խաչը երբեք ջրի տակ չի անցնում: Տեղացիների մոտ մի հետաքրքիր ընկալում կա. երբ ջուրը ծածկում է եկեղեցու պատերը, բայց խաչը չի անցնում ջրի տակ, ուրեմն այդ տարին նպաստավոր է լինելու իրենց համար:

Շրջագայությունը շարունակվում է, սակայն մտքերս չեն խաղաղվում. դրանք անընդհատ քշփորում են հուշերիս մատյանը ու ծակծկում հոգիս: Նայում եմ բնության այս գողտրիկ անկյուններին, որ ամեն ինչով հիշեցնում են քոչվոր ցեղերի ձեռքում հայտնված իմ չքնաղ Արցախին, ու հիշում մեծն Շիրազի տողերը.

Հիմա ո՞վ է ձեզ համբուրում,
Ծովասարիս ծաղիկներ,
Ի՞նչ որսկան է ձեզ ցած բերում,
Իմ Սիփանի եղնիկներ:

.....
Ո՞վ է ժողվում անտառներիս
Մեղրազազպե մանանան,
Փարախները թուխ գառներիս
Իրենց տեղը կմա՛ն...

Ամհուն ցավից կծկվում է սիրտս, երբ մտածում եմ, որ սառնորակ աղբյուրներիս



վճիտ ջրերը պղտորում են այդ խաշնարածները...

Մտքով՝ Արցախում, ֆիզիկապես՝ Լոռիում, հասնում ենք «Քարե սնկերին», ու դիտարանից մեր առջև բացվում է մի կախարդական աշխարհ: Հենց այս բարձունքից է Թումանյանը խոսել Աշխարհի հետ: Ն.Հովսիկյանը պատմեց, որ բանաստեղծը շատ է սիրել այս վայրը, քանի որ նրա ստեղծագործական միտքը փայլատակել է հենց այստեղ: Այդ երկնահաս բարձունքից երբ շուրջը ես նայում, թվում է՝ բարձրաբերձ լեռներն ու լազուր երկինքը այստեղ են համբուրվում...

Քիչ հետո Դսեղում էինք՝ գրողի ծննդավայրում, ուր թանձր մշուշի պես Թումանյանի շունչն էր տիրում: Ամենուր նրա հերոսներն էին, որ արձանացած դիմավորում էին մեզ: Եղանք գրողի տուն-թանգարանում, որի բարեհամբույր աշխատակիցները խնամքով ու ամենայն մանրամասնությամբ

ծանոթացրին մեզ նրա հայրական ընտանիքին պատկանող կենցաղային իրերին, սենյակներին կահավորանքին և թանգարանում պահպանված, կյանքի տարբեր փուլերում գրած ստեղծագործություններին: Թումանյանի հայրական տունը թանգարանի է վերածվել 1939 թվականին՝ մեծ գրողի ծննդյան 70-ամյակի առթիվ: Տուն-թանգարանի բակը գեղեցկացնում է Թումանյանի կիսանդրին: Տունն ունի երկու հարկ և վեց սենյակ: Հացատունը, մեծ օջախը և երկու ցուցասրահները գտնվում են առաջին հարկում: Երկրորդ հարկում ցուցադրված են բանաստեղծի մահճակալը, գրասեղանը, հագուստը և մի շարք այլ անձնական իրեր:

Տուն-թանգարանի բակում վեր խոյացող մատուռը իր մեջ ամփոփում է մի սուրբ մասունք՝ Թումանյանի մեծ սիրտը, որը երկար դեգերումներից հետո, ի վերջո, գտավ իր հանգիստը:

Օրվա անցուդարձից պարզվում է, որ այստեղ մշտապես մարդաշատ է լինում, նույնիսկ հերթ, որն էլ խոսում է այն անսահման սիրտ մասին, որ ժողովուրդը տածում է իր պաշտելի գրողի հանդեպ: Վերջին կանգառը Դսեղի «Ծովեր» կոչվող լճի մոտ էր: Լիճը գտնվում էր Դսեղ գյուղից 3կմ հեռավորության վրա՝ ծովի մակերևույթից 1900մ բարձրության վրա: Լիճը կարելի է համարել մշակութային հուշարձան, քանի որ հայ մեծանուն բանաստեղծ Թումանյանը բազում անգամներ անդրադարձել է այս լճին իր ստեղծագործություններում: Լիճը Թումանյանի սիրելի հանդիպման վայրերից էր, որտեղ հաճախ էին գալիս Ավ. Իսահակյանը, Շիրվանզադեն, Վ.Բրյուսովը, Վ.Տերյանը, Լեոն և այլք: Բարձր լեռների արանքում ծվարած այս փոքրիկ լիճը յուրահատուկ գեղեցկություն է հաղորդում Դսեղի լեռնաշխարհին՝ դառնալով բնասերների և զբոսաշրջիկների սիրելի ուղղություն:

Խմբի հետաքրքիր ժամանցը կազմակերպվեց հենց այս լճի ավին: Քանի որ խմբի անդամներից մեկի՝ Կարեն Մադոյանի ծննդյան օրն էր, մեծ շուքով՝ շնորհավորանքներով ու բարի մաղթանքներով ու սկսվեց նրա ծննդյան տոթը, ու սկսվեց Թումանյանի «ժամը». երգ, արտասանություն, պատմություններ, որին մասնակցեց խմբի անդամների մեծ մասը: Առավել հաճույքով ունկնդրեցինք արցախցի երիտասարդ մանկավարժ Նանար Սիմոնյանի երգն ու ասումը, Մարտունի քաղաքի հերոս ազատամարտիկ, «Մարտական խաչ» երկրորդ աստիճանի ասպետ Սարիբեկ Մարտիրոսյանի այրի Լիլիա Ավանեսյանի արտասանությունը (Թումանյանի «Մարո» պոեմը):



տեսա տան պատին արված մեր պատմական Հայրենիքի ձեռակերտ քարտեզը, այլ բացատրություն թերևս պետք չէր՝ այդ ընտանիքի մասին ամբողջական կարծիք կազմելու համար:



Ծավալված գրույցի ընթացքում համոզվեցի, թե ինչով է շնչում այդ ընտանիքը, համոզվեցի, որ նա հայրենիքի խնդիրներով մտահոգ մի նվիրյալ է, որն անտարբեր չի կարող անցնել հայրենիքում խորացող անարդարությունների կողքով: Այնքան թեժ էին քննարկումները, որ չէինք ուզում բաժանվել:

Շնորհակալ եմ ճակատագրին, որ հնարավորություն ընձեռեց ինձ՝ հանդիպելու ու ճանաչելու նման բացառիկ հայի:

Օրվա շրջագայության խիտ ծրագրով հագեցած՝ բռնեցինք վերադարձի ճանապարհը՝ հոգնածության ոչ մի նշույլ չզգալով: Վերադարձին էլ էր Թումանյանը մեզ հետ. անընդհատ հիշում էինք նրա անմահ ու իմաստուն մտքերը և պարզում, թե ինչքան շռայլ է եղել ժողովրդական այն ակունքը, որից սնվել է գրողը, որքան հարուստ է եղել այն բնօրրանը՝ Դսեղը, որ առատորեն լուսավորել է իր երախտավոր զավակի միտքն ու հոգին:

Իմ կրնունքին երկինքը՝ ժամ, արևը՝ ջահ սրբազան,

Ծիածանը նարոտ եղավ, ամենքի սերն՝ ավազան.

Սարը եղավ կընքահայրըս, ցողը՝ մյուռն կենսավետ,

Ու կընքողըս Նա ինքն եղավ, որ սահմանեց ինձ պոետ:

Դեռ երկա՛ր, շա՛տ երկար ժամանակ կշարունակվի մեր երկխոսությունը Թումանյանի հետ, քանզի տպավորությունները չափազանց առատ էին ու անմոռաց:

Ինչքան որ Թումանյանին մոտ լինեմք, այնքան էլ Մարդ կմնամք...

Սուրայա ՂԱԶԱՐՅԱՆ

ՀԱՅՐԵՆԻ ՈՍՏԱՆ

ՄԱԿԱՐ ԲԱՐԽՈՒՂԱՐՅԱՆ

ՅԱՌԱՋԱԲԱՆՈՒԹԻՒՆ
(Հատված «ԱՐՑԱԽ» գրքից)

Այնքան անհոգ եւ անտարբեր ենք, որ չզգիտենք թե ինչ հնութիւններ կան մեր հայրենիքում՝ մեր նախնիքներից մեզ աւանդ մնացած. չզգիտենք թե պատմական փշրանաց ինչ յիշատակարաններ կան թաքնուած մեզ շրջապատող լեռների, ձորերի եւ դաշտերի մէջ. չզգիտենք թե ազգային անցեալ պատմութեան մութ կէտերը լուսաբանող ինչ արծաճարութիւններ կան աւերակ վանքերի եւ անապատների, մատուռների եւ եկեղեցիների, խաչարձանների եւ տապանաքարերի վերայ եւ մագաղաթեայ գրչագիրների յիշատակարաններում։ Մեր անտարբերութիւնից օգուտ են քաղում օտարներն։

Մէն մի հայրենի նահանգ հետազօտելն անկ է ընկերութեանց եւ հարուստ անձանց, որպէս զի կարողանան նիւթականի ուժով՝ մասնագէտ, հմուտ անձանց եւ ականաւոր լուսանկարիչներ ձեռնով ի լոյս հանել նախնական ամէն մի հնութիւն եւ արծանագրութիւն իւրեանց իսկական ոճով եւ ձեւերով։ Սակայն տեսնելով, որ ժամանակի անողոր ճիրաններն լափում ու եղծում են մեր թանկագին հայրենիքի -Արցախի -ամէնապատուական հնութիւնները եւ արծանագրութիւնները. տեսնելով, որ տգէտ եւ թշնամի ձեռներ քանդում, աւերում եւ ոչնչացնում են հայրենի սրբազան աւանդները. տեսնելով, որ ցեցերն կրծում եւ անյայտացնում են անգին ձեռագիրների յիշատակարաններում եղած պատմական մարգարիտները եւ խոնաւութիւնն ու անհոգութիւնը կլանում են պատմական ակունքները. վերջապէս տեսնելով, որ ընկերութիւններն եւ հարուստներն ցարդ չձեռնարկեցին Արցախի հետազօտութեան գործին, վասն որոյ պարտք համարեցի սիրով կրել ամէն նեղութիւն, աղքատօրէն հետազօտել, գէթ ազատել մնացեալ յիշատակարանները աւերիչ ձեռքերից, ցեցերից եւ խոնաւութիւնից եւ ժամանակի ճիրաններից եւ զոնէ կազմել մի ուղեցոյց՝ ապագայ հմուտ մասնագէտների համար։ Ձոր օրինակ մեղուն ծաղկից ծաղիկ ոստոստելով հաւաքում է ծաղկանց ընտիր հիւքերը եւ կազմում պատուական մեղր. նոյնպէս շրջելով գաւառից գաւառ, գիւղից գիւղ, աւերակից աւերակ եւ սարից դաշտ՝ կազմեցի «Արցախ»ը։

Գործիս մէջ յական յանուանէ նշանակեցի Արցախեան նահանգի նախկին եւ փոփոխեալ սահմանազուխները եւ սոցա մէջ գտնուած լեռները եւ լեռնակները, դաշտերը եւ դաշտակները, գետերը եւ գետակները, մեծ-աղբիւրները եւ լճակները, նաւթահանք եւ հանքային ջուրերը, ոսկու եւ արծաթի, պղնձի եւ շիպի, երկաթի եւ պողպատի, երկանաքարի եւ շինութեանց քարերի հանքերը, քարայրերը եւ վիմափորները, անտառները եւ մացառները, պտղատու եւ անպտուղ ծառերի եւ քիւերի տեսակների անունները։ Երկաթիւրութեան մէջ գետեղեցի ինքնաբոյս եւ ցանուած ծանօթ բանջարեղինաց եւ կանաչեղինաց, ծաղիկների եւ խոտերի, ընտանի անասնոց եւ գրաստուց, սուրբ եւ անսուրբ կենդանեաց եւ գազանաց, բնիկ եւ երթեւեկ հաւքերի, սողունների եւ զեռուների, օձերի եւ միջատների, ծանձերի եւ մօղուկների եւ միանգամայն տեղական բերքերի տեսակների անունները (տեղ-տեղ տեղական բարբառով)։

Ըստ չափու ձեռնահասութեանս որոշակի նշանակեցի Ուտիական եւ Արցախական բոլոր գաւառների սահմանները [1] բացի մի քանի գաւառների միջնասահման գծերից, զորս անհնարին եղաւ ճշտիւ որոշել, վասն զի չկային միջնագիծ սահմանները որոշող բնական նշաններ, ինչպէս են գետեր, ձորեր, լեռներ եւայլն։ Իսկ մնացեալ բոլոր գաւառների չորս սահմանագլուխները որոշելուց յետոյ՝ կարգաւ նշանակեցի նոյն չորս սահմանների միջեւ գտնուած շէն, կիսաւեր եւ աւերակ քաղաքների եւ գիւղերի, վանքերի եւ անապատների, մատուռների եւ բեւերի, բերդերի եւ դղեակների տեղը, դիրքը, անունները, բնակչաց ծխաթիւը, արականաց եւ իգականաց որքանութիւնը, քահանայից եւ եկեղեցեաց քանակութիւնը, միանայ ծնելոց, պսակելոց եւ նքցեցելոց թիւերը, վարելահողերի եւ պտղաբերութեանց աստիճանները, օդի, կլիմայի եւ ջրի յատկութիւնները եւ ամէնից երկար ապրողի տարեթիւը։

Համառօտ ծանօթութիւնները գրեցի մէն մի

երեսի ստորոտում, իսկ ընդարձակները՝ գրքիս վերջում, ուր առանձին-առանձին գետեղուած են նաեւ բոլոր յատուկ անուանց, շէն եւ աւերակ քաղաքների, գիւղաքաղաքների, գիւղերի, վանքերի եւ բերդերի ցանկերն եւս։ Այս ամէնը յայտնելուց յետոյ յայտնում են նաեւ. Ա. Հետազօտութեանց ժամանակ ո՛չ կռատանց հետք գտայ եւ ո՛չ մեհեանների, ո՛չ Արցախական եւ ո՛չ Ուտիական նահանգներում։ Միայն գտայ, որ կռապաշտ դարերի ընթացքում ամփոփուած են ննջեցեալներն չորս ձեւով.

Նախ՝ ահագին, խեցեղէն կարասներում։ Երկրորդ՝ երեք ահագին քարերի տակ՝ կռնկի վերայ երկարցրած։ Երրորդ՝ մեծ-մեծ քարերի տակ նստեցրած դիրքով։

Չորրորդ՝ աւազանանման վիմափոր տապաններում, որք ունին եւ կափարիչ քարեր։ Իւրաքանչիւր ամփոփեալ, թէ՛ արական եւ թէ՛ իգական, իւր հետ ունի գերեզմանում իւր զէմբերը եւ զարդերը։ Բացի իգականաց զարդերից լինում են խեցեղէն պուլիկներով լի ուլունքներ։

Բ. Մի մղոնը գործածած են 7 վերստի տեղ, այլապէս 7 վերստն հաւասար է մի մղոնի։

Գ. Չափելու համար գործածած են մետր չափը, որովհետեւ գրեթէ ընդհանրացած է չափս ամէնուրեք։

Դ. Անխտիր չափած չեն բոլոր վանքերի, եկեղեցիների եւ բերդերի երկարութիւնները եւ լայնութիւնները, այլ միայն չափած են հարկ համարածներս։

Ե. Գործածեցի ժողովրդական սեռ բառը, որ կարճ գեղեցիկ եւ իսկական իմաստը յայտնող է եւ որ նշանակում է լեռների եւ լեռնակների թրածեւ երկարած գազաթնագիծը։ Ըստ մեր կարծեաց, սեռ արմատիս հետ բարդուած է շարականի սեռականձեւ սեռ-ակն-ձեւ բառն. այսպէս է եւ ճախարակի իլկի լիսեռն, լի-սեռ բառն։

Ձ. Առանց ձանձրանալու ընդօրինակեցի բոլոր գրչագիրների յիշատակարաններից (արժան համարուած) հատուածներ եւ պատմական հետաքրքիր կտորներ եւ վանքերի, եկեղեցիների, անապատների, մատուռների, ապարանների, խաչարձանների, մատուքների, եւ մահարձանների արձանագրութիւնները, մասնաւոր՝ պատմականները։

Զ. Արցախեան ջրերից գետ անուանեցի միայն Թարթառը, Հակարին եւ Աղստեւը, իսկ գետակ եւ վտակ՝ մնացեալ ջուրերը, քանզի ամբողջ ամառ եղանակներում չեն հասնում Կուր գետին։

Ը. Համարեա թէ շատ լեռների, լեռնակների, բլուրների, բլրակների եւ սեռերի վերայ արձանացած են վաղեմի, քարեայ, անպաճուճ եւ անարձանագիր խաչեր։ Այս անխօս խաչարձանների մասին աւանդութիւնն ասում է. Մի մասն տնկուած է Ս. Գրիգոր Լուսաւորչի հրամանաւ, մի մասն՝ Ս. Գրիգորիսի եւ միւսն՝ Ս. Մեսրոպի։

Թ. Հմարաւոր եղածին չափ նշանակեցի ուսումնաբարանաց անունները, թիւը, աշակերտաց որքանութիւնը եւ դրամական մտից եւ ելից քանակութիւնը։

Ժ. Արցախեան մէն մի գաւառ ունեցած է իւր սեպիական վանքը եւ իւր առանձին գաւառակալ առաջնորդը միաբաններով հանդերձ, որ նստելով իւր իսկ վանքում հովուած է նոյն գաւառի բանաւոր հօտը, օրինակ Դիզակ գաւառն իբրեւ եպիսկոպոսարան նախ ունեցած է Դիզափայտ վանքը, ապա՝ Կաւաք, ապա՝ Գտիչ եւ յետոյ՝ Սպիտակ-Խաչ վանքը. Վարանդան՝ Ամարասը եւ Հիրիների տաճարը եւ երբեմն՝ Քոչիզի շինութիւնը. Խաչենն՝ Մեծ-արանց կամ Մեծ-իրանաց վանքը եւ Մայրաքաղաք, Ընստակ գաւառն՝ Դատի վանքը, Ջրաբերդն՝ Ջրվշտի կամ Եղիշ-առաքեալի վանքը, Մեծ-Կողմերի կամ Կիւլստանն՝ նախ Հռնեկայ եւ ապա Ամէնափրկիչ վանքերը, Գարդմանն նախ Սլզնաբերդ եւ յետոյ Թարգմանչաց վանքերը, Փառիսոսն՝ նախ Փառիսոսի, ապա Խորանաշատի եւ յետոյ Չարեքայ վանքերը, Քուստի կամ Քաւս գաւառն՝ Շիմուրատայ եւ Վարազայ վանքերը, եւայլն, եւայլն։ Դեռ 1828-ին շէն եւ պայծառ եղած են վանքերս, ինչպէս վկայում են ականատեսներն։ 1764 թուին հետեւեալ վանքերում գահակալում էին Աղուանից հետեւեալ եպիսկոպոսներն.

Մելքիսեթ արքեպիսկոպոս առաջնորդ Եղիշ-առաքեալի, Ազարիա եպիսկոպոս ,, Հռնեկայ, Ջաքարիա եպիսկոպոս ,, Գանձակի, Իսրայէլ արքեպիսկոպոս ,, Թարգմանաց, Օհաննէս ,, ,, Փառիսոսի վանից։ Բայց յայտնի է, թէ Աղուանից կաթողիկոսութեան մահից յետոյ, այս է 1828 թուականից յետոյ վանքերն հետզհետէ սկսած են զրկուիլ եւ անգաւականաւ միաբանական խմբերից եւ անխնամ մնալով քայքայուիլ մեծ մասամբ։ Լուսահոգի Բաղդասար մետրապօլի կենդանութեան ժամանակ շէն եւ պայծառ տեսած են Եղիշ-առաքեալը, Ինն մասը, Գանձասարը, Ս. Յակովբը, Պոկեւսերգը, Ամարասը, Գտիչը եւ Սպիտակ-Խաչը եւ Դեռնդեանց անապատը վանահայրերով, միաբաններով եւ ուսումնարաններով։

Ձոր օրինակ քաղաքական բուռն հոսանքներից ստիպեալ տեղից տեղ փոխարդուած է յաճախակի Հայոց ընդհանրական վեհաբանն, նոյնպէս ստեղ-ստեղ տեղից տեղ փոխարդուած է եւ Աղուանից կաթողիկոսարանն, որ հաստատուած է ա. Դարբանդ կամ Չողա. բ. Գիս (ըստ աւանդութեան). գ. Պարտաւ. դ. Կթղըկոսարան (Դոնի շինի հանդէպ). ե. Եղիշ-առաքեալ կամ Ջրվշտիկ գ. Գանձակ, է Քարահերձ ը. Խամշի վանք, թ. Հաղբատ. զ. Գանձասար ժա. Ջալէթ

Ժբ. Վերստին Գանձասար, ուր եւ վախճանուած է կաթողիկոսութիւնն Աղուանից եւ թաղուած վերջին Սարգիս կաթողիկոս Ջալալեանը։ Աղուանից կաթողիկոսների մասին գրելու են «Աղուանից պատմութեան» մէջ եւ ոչ այստեղ։

ԺԱ. Որովհետեւ արդէն գրած են «Աղ. երկ. եւ Դրացիք» գրքում, վասն որոյ աւելորդ համարեցի գրել Արցախի կրօնական եւ քաղաքական կենաց մասին եւ զիւղական հիւանդութիւնների եւ բժշկութիւնների եւ կերակուրների մասին, որք գրեթէ նոյն են ամենայն մասամբ, միայն Արցախն չունի խնկալ կերակուրը։

ԺԲ. Հողը. գրեթէ առհասարակ ջրարբի, բազմաբղին (այժմ բացի Մուղանի դաշտից) եւ գաճային են ամբողջ դաշտային գաւառների հողերն, որովք վարձատրուում են երկրագործներն եւ հովիւներն եւ անասնապահներն առատագոյն ցորենով, գարիով, բոժոժով, բամբակով, ամենատեսակ ազնիւ պտուղներով, ազնիւ ոչխարով, տաւարով, զոմէշով, ծիւղ եւ ուղտով։ Միջակ արդիւնաւետ եւ անջրդի են Դիզակի, Վարանդայի եւ Բերդաձորի հողերն, նուազ արդիւնաբեր՝ Խաչենի, Հարճլանքի, Վակունիսի, Ծարի, Ընստակի, Ջրաբերդի, Կիւլստանի, Գարդմանի, Փառիսոսի, Քաւսի եւ Ջալէի վերնամասի հողերն։

ԺԳ. Ջուր. Համարեա՝ թէ ընդհանրապէս առատ, ամենապատուական եւ վճիտ են Արցախի բոլոր գաւառների ջուրերն եւ միանգամայն ակնաբարուլիս. իսկ դաշտայինն (Ուտիական նահանգինն) առհասարակ գետերի, գետակների, առուների եւ առուակների եւ ուրեք-ուրեք ջրհորի ջուրեր են, որք լինում են յաճախակի պղտոր եւ անախորժ, սակայն ոչ վատառողջ։

ԺԴ. Որք. Բացի Գանձակի որթից, որ ջրարբի է, սակայն հեծած չէ ծառի վերայ, դաշտային բոլոր որթերն (այգիներն) ամբողջապէս ջրարբի են եւ բարձրացած ծառերի վերայ. Արցախեան գաւառներինն ընդհանրապէս անջրդի են, որոց մատերը (ծայրերը) ամէն զարման յապաւում են եւ կապոտում մարդաչափ բարձրութեամբ ցցած սարու (ծողերի) վերայ, ինչպէս եւ Գանձակինն։

ԺԵ. Հագուստ. թէ՛ արականաց եւ թէ՛ իգականաց զգեստներն ունին իւրեանց յատուկ ձեւը, զորս տեսած կը լինի ամէն ոք, քանզի համարեա, թէ ամէնուրեք գտնուում են արցախեցիները։ Սակայն հարկ է յայտնել, թէ մի քանի տարիներից վեր մուտ գործած են Արցախ թիֆլիսի եւ Եւրոպայի սեպիական արականաց եւ իգականաց զգեստների ձեւերն։

ԺԶ. Բնակարան. Գաւառներում տակաւին ամենամեծ մասամբ գետնափոր են բնակա-

րանները եւ անշուք. բայց նոր »ի նորոյ սկսած են շինել եւ երկարկանի գեղեցիկ բնակարաններ։ Ամենամեծ մասամբ գեղեցկաշէն են քաղաքների բնակարաններն։

ԺԷ. Վանքեր, մատուռներ եւ բեմեր. Կարծում են, թէ ոչ մի նահանգ այնպէս հարուստ չէ այսպիսի սրբավայրերով եւ ուխտատեղիներով, ինչպէս Արցախեան նահանգն. բայց եւ այնպէս ոչ մի նահանգի վանքեր, անապատներ եւ ուխտատեղիներ այնպէս բոլորովին զրկուած չեն իւրեանց բարոյական եւ նիւթական փառքերից, ինչպէս Արցախեան վանքերն եւ սրբավայրերն։

ԺԸ. Ցրուած եւ գերուած հայեր. բոլորովին զարմանում եւ սրտաճնիկ դրութեան մէջ է ընկնում հետազօտող հայն, երբ տեսնում է միլիօնաւոր հայ բնակիչներով հարուստ Արցախն իսպառ դատարկուած։ Այո՛, դատարկուած են իւրեանց հայ եւ հայադաւան բնակիչներից Պիան, Մուղան, Վարդանակերտ, Արանոտ, Տրի, Ռոցպատեան, Աղուէ, Տուչքատակ, Ուտի-առանձնակ, Շիկաշէն, Կողթ, Բերդաձոր, Հարճլանք, Վակունիս, Ծար եւ Ընստակ գաւառներն. իսկ կիսով չափ կամ ամէնամեծ մասամբ դատարկուած են Գարդման, Փառիսոս, Քաւս կամ Քուստի, Ջալէ, Ջրաբերդ, Խաչեն, Վարանդայ եւ Դիզակ գաւառներն։ Ի՞նչ եղան սոցա հայ բնակիչներն։ Մի մասն կերակուր եղաւ. 1798-1799 թուի տվին եւ ժանդախտին. մի մասն գերի գնաց Պարսկաստան, մի մասն Պարսկաստան, մի մասն՝ Շաքի եւ Շամախի, մի մասն՝ Կախեթ եւ Վրաստան, մի մասն՝ Բազու, Ղուբա, Դարբանդ եւ Ռուսիա։ Տասնից մին հազիւ մնացած է այսօր։

ԺԹ. Օտար ցեղեր. Դաշտային գաւառներում բնակում են այժմ արաբ, սուննու եւ շիա մահմետականներ, որք առհասարակ երբեւեւ կում են ամարանոց եւ ձմերանոց եւ տարուայ մեծ մասը անցուցանում են թաղիքեայ վրաններում։ Թաթարաց ցեղից մնացորդներն բնակում են Ջակամ կայսրանից վերեւ համանուն գետակի հովիտներում։ Մարաց ցեղից թուրքեր բնակում են Ծար, Վակունիս, Հարճլանք եւ Բերդաձոր գաւառներում, իսկ Քոլանի կոչուած ցեղն՝ Ընստակ գաւառում։ Սոքա առհասարակ յետոյ մուտ գործած են։

Ի. Արտահանութիւն. Նահանգս արտահանում է ցորեն, գարի, բոժոժ, բամբակ, բուրդ, բրինձ, լուբիայ բակլայ, սոխ, սխտոր, գետնախնձոր, ստեպղին, ճակնդեղ, ձմերուկ, սեխ, վարունկ, խաղող, գինի, օղի, ընկուզ, իւղ, պանիր, մեղր, կով, եգն, զոմէշ, ոչխար, այծ, խոզ, ձի, ջորի, ուղտ, արքենի, աղուխենի, ընձենի, զայլենի, սամուր (ղէլէ) զոմէշենի, տաւարի, ոչխարի, ձիու, ջորու, խոզի կաշիներ եւ մորթիներ, պատուական գորգ, կարպետ, մափռաշ, խուրջին, ջրաղացաքար, տապանաքար, ձուկն, ձկնհաւիթ եւ ձկնապուխտ։

ԻԱ. Շրջապայութեան ժամանակ կրեցի մեծ նեղութիւն. երեք անգամ ազատուեցայ արիւնաբրու աւազակաց ձեռքն ընկնելուց, երեք անգամ ծիւ տակ մնացի վտանգաւոր տեղերում, այս է՝ սահեցաւ ծիւ ոտքերն, ընկաւ ուժօգնակի գետնին եւ եւ մնաց ծիւ ներքեւ. երեք օր մնացի անսուաղ Ծար գաւառում հաց չգտնելու պատճառաւ։

ԻԲ. Այս ամէնը յայտնելուց յետոյ, յայտնում են հրապարակաւ իմ երախտագիտութեան խորին յարգանքը եւ ջերմ շնորհակալութիւնը այս ամէն լավդապետ, քահանայ արծեղբարց, վարձապետ, երիտասարդ, պատանի սիրելեաց, ազնիւ տանուտեարց, որք անմուրիաբար օժանդակեցին ինձ այս ծանրագոյն գործում, որոց վասն մնամ միշտ աղօթարար։

Մակար եպիս. Բարխուտարեանց

[1] Գաւառների սահմանագծերը որոշելու համար՝ հնարաւոր զգուշութեամբ հետեւած են պատմութեանց, վանքերի արձանագրութեանց, մի քանի ձեռագիր աւետարանների յիշատակարաններին Աղուանից կաթողիկոսներին տուած շահական հրովարտականքին, Էջմիածնի եւ Աղուանից կաթողիկոսների կոնդակներին մատնանիշ արած սահմանագծերին եւ բազմադարեան յարատեւած աւանդութեանց կանոնի զօրութիւն ստացած տրամադրութեանց։

ԹԱՏԵՐԱԿԱՆ ԱՐՑԱՆ

«ՌՈՒԶԱՆ»-Ը` ՀԱՄԱԶԳԱՅԻՆԻ ԲԵՄՈՒՄ

Երբ ծագում է մեզ արևը լուսավոր,
Յայ տղաներ, սթափեցեք ծեր քնից,
Լծեք եզինք, առեք գութանն ու
արոր

Եվ փութացեք դաշտը հերկել
ցողալից:

Իսկ երբ հեռվից մեր թշնամին երևի,
Յայ տղաներ, թողեք արորն ու
եզինք,

Յարձակվեցեք թշնամու դեմ կատաղի,
Կովեցեք քաջ և փրկեցեք հայրենիք:

Հայաստանի թատերական գործիչների միության (ՀԹԳՄ) և Մոսկվայում գործող «Դիալոգ» հասարակական կազմակերպության աջակցությամբ Երևանում վերակազմավորվել ու գործում է Ստեփանակերտի Վահրամ Փափազյանի անվան պետական դրամատիկական թատրոնը (զեղարվեստական ղեկավար՝ Ռուզան Խաչատրյան): 2025թ. օգոստոսի 19-ին նշված կառույցների ղեկավարները կնքեցին պայմանագիր՝ աջակցելու Ստեփանակերտի թատրոնին: Դրանից հետո Ստեփանակերտի պետական թատրոնը՝ Ռ. Խաչատրյանի ղեկավարությամբ, երևանյան տարբեր բեմերում մի քանի անգամ ներկայացրել է Լվեքսանդր Մանասյանի «Արցախյան սիրո հեքիաթ կամ Արա, պա ստի պեն կինի» ստեղծագործությունը՝ Արցախի բարբառով: Մի քանի ամիս է, ինչ թատրոնը պատրաստվում էր բեմականացնելու Մուրացյանի «Ռուզան կամ հայրենասեր օրիորդ» պատմական դրաման, որն արդիական է նաև այսօր: Հունիսի 28-ին վերջապես կայացավ թատերախմբի աշխատանքի արդյունքը. Երևանում՝ Սոս Սարգսյանի անվան Համազգային թատրոնի բեմում, ներկայացվեց «Ռուզան»-ը, որի ղեկավարը տեղի են ունենում մոնոլոգ-թաթարական արշավանքների ժամանակ Արցախում 13-րդ դարում: Այս կարևոր միջոցառմանը ներկա լինելու համար Մոսկվայից Երևան էր եկել «Դիալոգ» ՀԿ հիմնադիր ու նախագահ Յուրի Նավոյանը: Ներկա էր նաև ՀԹԳՄ նախագահ Հակոբ Ղազանչյանը: Դրամայի հիմքում հայրենասիրությունն է: Գործողությունների հիմնական մասը տեղի են ունենում Արցախի իշխանաց իշխան Հասան Ջալալ Դուլայի ամրոցում ու պալատում: Բոլոր ժամանակներում էլ անձնական շահի, վրեժխնդրության և այլ պատճառներով լինում են հայրենիքը դավաճանողներ, և որի արդյունքում մեծ դժբախտության է ենթարկվում հատկապես անմեղ ժողովուրդը: Չգրված օրենքի համաձայն՝ դավաճանին պատժում է հենց նրա ծառայությունից օգտված թշնամին: Այսպես էլ «Ռուզան» դրամայում է: Իշխան Համադունը (ղերում՝ Սամվել Սարգսյան), չհասնելով իր նպատակին՝ ամուսնանալ Արցախի իշխանաց իշխանի դստեր՝ Ռուզանի հետ, նախանձելով հերոս իշխան Ներսեհին, իր ծառայությունն է մատուցում թաթարաց գորապետ Ջուլային: Ռուզանի և Ներսեհի հարսանիքի օրը գուժկանը պատերազմի լուր է բերում պալատ: Համադունը թշնամուն տեղեկացրել էր Հասան Ջալալի ամրո-

ցի գործի, ինչպես նաև իշխանի գեղանի դստեր մասին:

ՀԱՍՏՈՒՆ.- (Բուրային) Ջալալի գանձերի մեջ, տեր Նուրի, դուք, արդարև, չեք գտնիլ այնպիսի մի հագվազյուտ բան, որից հարուստ Թաթարստանը չուներնար, բայց յուր սնդուկներից դուրս մա ունի մի այնպիսի գանձ, որի նմանը, արդարև, մեծ Թաթարստանը չունի. և արժե, տեր, որ այդ գանձը դու՛ ունենաս:

ՋՈՒՆ.- (հետաքրքրությամբ) Ինչպիսի՞ գանձ է այդ:

ՀԱՍՏՈՒՆ.- Մի աղջիկ, որ հրեշտակից ավելի գեղեցիկ է և արշալույսից ավելի հրաշալի:

ԲՈՒՐԱ.- (ոգևորված) Այդ գեղեցկու-



հին իմը կլինի: Եթե բոլոր աշխարհն անգամ ինձ ընդդիմանա, այսուամենայնիվ, ես նրան կառնեմ: (Դառնալով դեպի Ջուլան) Հորեղբայր, ի՞նչ կասեիր, եթե ես իմ հոր՝ Չարմաղանի կողմից հրամայեի բերդի պաշարումը վերցնել և Ջալալ իշխանի դուստրը ինձ կնության առնելով՝ բարեկամություն հաստատեի նրա հետ և մեր զորքերը նրա երկրից հանեի:

Այս դրվագներից հետո թաթարաց գորապետի եղբոր որդին՝ Բուրա-Նուին (ղերում՝ Լևոն Այվազյան), իրենց



մոտ բազում նվերներով բանակցության եկած Հասան-Ջալալի ավագ եղբորը՝ Ջաքարեին (ղերում՝ Սարատ Դավթյան)՝ իր պահանջն է ներկայացնում՝ ամուսնանալ Ռուզանի հետ: Ասում է՝ միայն այդ դեպքում է պատրաստ ազատ արձակել հագարավոր գերյալներին: Պարզ է՝ Ռուզանի հայրը, նշանածը, հարսանիքի առիթով հյուր եկած հայոց տարբեր վայրերից հյուր եկած իշխանները՝ Պապաքը, Սմբատը, իշխանի կինը՝ Մամբանը, այլք ղեմ են, որ Ռուզանն ամուսնանա թշնամու գորավարի հետ: Սակայն հագարավոր հայրենակիցների կյանքը փրկելու համար Ռուզանը՝ իր մոծիստի օգնությամբ, գիշերով գաղտնի հեռանում է պալատից և հասնում թշնամու բանակ: Հայոց էպոսածին Ծովհնարի նման Ռուզանն էլ իր պայմաններն է առաջ քաշում, որ թաթար գորավարն ազատ արձակի հայ գերիներին,

բանակը հեռացնի հոր ամրոցից, գլխատի դավաճան Համադունի և այլ հայրենաճակներ առաջարկներ: Սիրահարված թաթար գորավարը կատարում է Ռուզանի բոլոր պայմանները: Բայց Արցախի դուստրը ինքնագոհությամբ առավել է ընդունում, քան ամուսնանալ թաթարի հետ. թույն է ընդունում: Նույն ժամանակ հայոց զորքերը հաղթում են թշնամուն, Ներսեհը գտնում է նշանածին, սակայն արդեն ուշ էր: Ներկայացման ամբողջ ընթացքում հանդիսատեսը լարված հետևում էր դերասանների խաղին: Ճանաչված ու փորձառու դերասանների հետ խաղում էին նաև երիտասարդները, այդ թվում նաև՝ «Գալյա Նովենց» թատերական դպրոցի Արցախի կուրսի ուսանողները: Ռուզանի դերում հրաշալի խաղաց երիտասարդ Շողեր Սարգսյանը: Վերջերս «Դիալոգ»-ի երևանյան մշակութային կենտրոնում տեղի ունեցավ «Գալյա Նովենց» թատերական դպրոցի Արցախի կուրսի ուսանողների հանդիպումը Յու. Նավոյանի և Հ. Ղազանչյանի հետ: Նույն դպրոցի Արցախի խմբի երկրորդ կուրս փոխադրված Շողերը, որը ինչ-որ ժամանակ կորցրել էր հույսը

տուն՝ Արցախ վերադառնալու առումով, ասաց՝ թատրոնի շնորհիվ հավատում է՝ որպես կայացած դերասանուհի, մի օր իրենց խմբով խաղալու են Արցախի բեմում: Իսկ Ռուզանի դերում խաղան առավել իրատեսական է դարձնում շնորհալի դերասանուհու երազանքը: Իշխան Հասան-Ջալալի դերում հանդես է գալիս Հայաստանի վաստակավոր արտիստ Շանթ Հովհաննիսյանը: Թաթարաց գորապետ Ջուլայի դերում տարբեր ֆիլմերում խաղացած Սարգիս Գրիգորյանն է:

Մեծ պատասխանատվությամբ ու սիրով հանդես եկան բոլոր դերասանները, որն էլ նրանց խաղը դարձրեց հրաշալի, ոգևորիչ, հուզող: Բացի դերասանների խաղից արժանին պետք է ասել նաև նկարչական ձևավորող Անտոն Քեշիշյանին և զգեստների ձևավորող Սարինե Թադևոսյանին:

«Ռուզան» ներկայացումը մույն բեմում կայացավ նաև հունիսի 29-ին: Ինչպես միշտ, այս անգամ էլ դահլիճում շատ էին արցախցիները, որ մշտապես հայրենի տան կարոտով են միմյանց հանդիպում: Ներկայացման վերջում թատրոնի ղեկավարական ղեկավար ու դրամայի բեմադրիչ Ռ. Խաչատրյանը հուզված նշեց՝ վերջապես իրականացավ իր ու թատերախմբի երազանքը՝ ներկայացնել Մուրացյանի «Ռուզան»-ը: Շնորհակալություն հայտնեց հանդիսատեսին, աջակիցներին: Առանձնակի երախտագիտություն հայտնեց Հ. Ղազանչյանին ու Յու. Նավոյանին, որոնք մեծ հավատով աջակցեցին իրենց:

Արդեն ավանդույթի համաձայն, երբ երևանյան բեմերում տեղի են ունենում «Դիալոգ»-ի աջակցությամբ ՀՀ-ում վերականգնվող ժամանակ առցախյան մշակութային խմբերի ելույթներ, զուգահեռ միջանցքներում կազմակերպվում են դարձյալ արցախցիների ծեռքի աշխատանքների և այլ ապրանքների ցուցահանդես-վաճառքներ:

«ՀԱՐԵՎԱՆՆԵՐ» ՆԵՐԿԱՅԱՑՄԱՆ ԱՌԱՋՆԱԽԱՂԸ

Հունիսի 23-ին Երևանում՝ «Դիալոգ» կազմակերպության մշակութային կենտրոնում, առաջին անգամ ներկայացվեց Թբիլիսիի «Օբլոդնի պերեուկ» թատերական ստուդիայի «Հարևաններ» կատակերգական պիեսը,



որի հեղինակն է Արտյոմ Գրիգորենցը: Ներկա էին Մոսկվայում գործող «Դիալոգ» ՀԿ հիմնադիր ու նախագահ Յուրի Նավոյանը, որի աջակցությամբ էլ կայացավ պիեսի ներկայացումը, Հայաստանի թատերական գործիչների միության նախագահ Հակոբ Ղազանչյանը, մշակութային գործիչներ, թատերասերներ, հյուրեր: Ներկաներին ողջունեց Ա. Գրիգորենցը՝ կարևորելով այն, որ թբիլիսյան թատրոնը հանդես է գալիս Երևանում: Շնորհակալություն հայտնեց Յու. Նավոյանին, ներկաներին: Բեմում հանդես եկան Դաիլա Լետոդիանին, Իրինա Գրիգորյանը և Ալեքսեյ Բախտիլինը: Ներկայացումը բեմադրել է հեղինակը՝ ժողովրդական թատրոնի ձևաչափով, իր մասնավոր թբիլիսյան «Օբլոդնի պերեուկ» թատերական ստուդիայում, որը գտնվում է Թբիլիսիի պատմական թաղամասում՝ հայ դասական գրող Նար-Դոսի բնակարանի հարևանությամբ: Նար-Դոսի հետ ընկերություն է արել Ա. Գրիգորենցի պապը: «Դիալոգ»-ի



տեղեկությամբ՝ հայտնի է, որ Թբիլիսում (Թբիլիսի), որպես Ռուսական կայսրության Կովկասի վարչական կենտրոն, XIX դարի սկզբից բուռն զարգացում էր ապրում հայկական մշակույթը, որի անբաժանելի մասն են այստեղ ձևավորված հայկական թատերական ավանդույթները: Արտյոմ Գրիգորենցը և նրա բազմազգ թիմը այդ հարուստ ժառանգության կրողներն են և իրենց գործունեությամբ ակտիվորեն զարգացնում են միջմշակութային երկխոսությունը: Արդի թեմաներով երգիծական պիեսում հարևաններն են. տարբեր առիթներով վիճում են, սակայն միշտ էլ գտնում են մեկ երկխոսելու, միմյանց նկատմամբ բարի լինելու ձևեր, առիթներ: Օրինակ՝ վեճի առիթ է դառնում կոշիկների շուրջ, որի բարձր հաշտը խանգարում է հարևանուհուն: Վերջինս առաջարկում է շան փոխարեն ակվարիումով ձուկ պահել, որը հանդարտեցնում է նյարդերը: Հանդես է գալիս նաև կենցաղապասարկման՝ տվյալ դեպքում զագի գրասենյակի ներկայացուցիչ-տեսուչը՝ իր «բարձրությամբ»: Արտաքուստ թեթև լինելու հետևում թաքցված են փոխըմբռնման և մարդկային հաղորդակցության իմաստի վերաբերյալ խոր փիլիսոփայական մտորումներ:

Հյուրերի այցը Երևան կարևորեցին Յու. Նավոյանը և Հ. Ղազանչյանը: Նման միջոցառումները նաև կարող են լինել երկխոսություն հայ և վրաց, նաև այլ ժողովուրդների միջև, բարեկամական կապ: «Դիալոգ» կազմակերպության կարևոր առաքելություններից մեկն էլ ժողովուրդների բարեկամությունն է: Նշեն՝ «Դիալոգ»-ի աջակցությամբ այսօր Երևանում վերակազմավորվել ու գործում են արցախյան մի քանի մշակութային խմբեր, որոնց ներկայացուցիչները մույնպես ներկա էին դահլիճում, տպագրվում են գրքեր:

ԶՓԱԿՎՈՂ ԿԱՐԱԳՈՒՅՐ

ԵՐԿՐԻ ԿԱՐՈՏՈՎ ՈՒ ՀԱՎԱՏՈՎ

«Սարից այն կողմ»-ն ուղերձ է սերունդներին Արցախը չմոռանալու և այն հետ վերադարձնելու մասին: Վայա Գոթյան-Կաժոյան

Հուլիսի 1-ին Երևանի Հովի. Թուման-յանի անվան ազգային տիկնիկային թատրոնի բեմում արցախցի դերասաններն էին: «Սարից այն կողմ» մեկ գործողությամբ դրաման Արցախյան 2020թ. սեպտեմբերի 27-ին սկսված 44-օրյա պատերազմից հետո Ստեփանակերտում բնակվող մեր հայրենա-կիցների մասին է: Ցանկացած արցախցի իրեն կգտնի դրամայի հերոսների կերպա-րում: Պիեսի հեղինակ ու բեմադրիչ, ամերի-կահայ ռեժիսոր Կարինե Քոչարյանի հերոս-ներն ունեն իրենց իրական նախատիպերը, որոնց հանդիպել է հեղինակը, ծանոթացել նրանց պատմությանը: Հայոց շվիի (երա-ժիշտ՝ Գագիկ Ադամյան) քաղցր ծայրը կա-

հարևանությամբ: Սուրճ է մատուցում շախ-մատ խաղացող տարեցներին՝ Վաղոյին ու Ավոյին, հույս է տալիս Անուշին, որ Արամը տուն է գալու: Այլ է 85-ամյա Առաքել պապի հոգեվիճակը: Թշնամու տիրապետության տակ է մնացել նրա տունը, հայրենի գյուղի հանգստարանում է մնջում կինը: Առաքել պապը որոշում է իր տուն գնալ՝ հանգիստ ապրելու: Բայց նրա տունը մնացել է թշնա-մու տիրապետության տակ մնացած տա-րածքում: Պատանի Տիգրանը պատահա-բար հանդիպում է Առաքել պապին, իմանում նրա որոշման մասին, զրուցում են:

- Առաքել սարը տեսնու՞մ ես, - հարցնում է Առաքելը:
- Այո, տեսնում եմ, - Տիգրանի պատաս-խանը:
- Դա չէ, դրա հետևի սարը տեսնու՞մ ես...
- Չէ՛է՛...
- Ա՛յ, այնտեղ է իմ տունը...

Տիգրանը կարողանում է հա-մոգել ու իրենց տուն տանել տան կարոտով տառապող ծե-րունուն, որը ողջ արցախցիների հավաքական կերպար է: Տունը կանչում է...

Արցախցի իսկական պատա-նու կերպար է Տիգրանը, որի մաններին շատ են հանդիպել: Ինչպիսի՞ մեծ սեր ու հարգանք է տածում տարեց մարդու հան-դեպ: Պարզվում է՝ Առաքել պապն ու Տիգրանի Շուշան տա-տը ծանոթներ են: Բայց Առաքելը գաղտնի հեռանում է Տիգրանենց տնից: Բոլորը փնտրում են նրան, ու պարզվում է՝ աղբե-ջանցիներն սպանել էին 85-ամյա անգն ծե-րունուն, որն ընդամենը փորձել էր իր տուն գնալ: Մեծ ողբերգություն է ապրում Տիգրա-նը: Հրաշյա Քոչարի «Կարոտ» գրքի գլխա-վոր հերոսը՝ Հայոց մեծ եղբուն մազապուրծ փրկված Առաքելը, մույնպես մեծ կարո-տով է հիշում հայրենի գյուղը Արաքսի այն ափին: «Գյուղն Արաքսի ափին է: Այստեղ ոչ ոք դաշտապահ Առաքելի մեծ չի տեսնում ու չի զգում բնության գեղեց-կությունները, թեև չկա մարդ, որ իրեն ավելի խելոք չհամարի նրա-նից ու չծաղրի նրան», - գրում է Քոչարը՝ ներկայացնելով իր հերոսի մեծ ողբերգու-թյունը: Քոչարի Առաքելն էլ գաղտնի հեռա-նում է տնից, անցնում Արաքսը, հասնում իր տուն, վերադառնում և դառնում է խորհրդա-յին հայ չեխիստների զոհ: Չգիտեմ՝ պատա-հաբար են համընկել մեկ դար տարբերու-թյամբ կայացած իրադարձությունները: Աստղիկի պապը՝ Վաղոն, խանութ ունի Ստեփանակերտում, սակայն, ինչպես ասում է՝ իր օգուտը «միսյայի տետրն է»: Որոշում է հեռանալ Արցախից, գնալ Ռուսաստան, որ-տեղից հայրենիք էր եկել ինչ-որ ժամանակ՝ ընդմիջում մնալու հավատով, որ ռուս խաղա-ղապահները կպաշտպանեն արցախցուն, որ գոնե մնացած տարածքներում կկարո-ղանան իրենց տերերն ապրել: Սակայն պա-տերազմից հետո տեղի ունեցող իրադար-

ձությունները հուշում են նրան մոտեցող բռնի տեղահանման մասին: Հեռանալով՝ իր հետ պետք է տաներ նաև թոռնուհուն՝ Աստ-ղիկին: Վաղոյի հարազատ ընկերը՝ պատե-րազմում հաշմանդամ դարձած Ավոն, դեմ է, որ պետք է լքեն Ար-ցախը: Խռովում է ընկերոջից. «Հու վեր Արցախը թողնում գնա, նա ինձ հընգեր կարա չի լինի»: Տխուր ու ցավալի տե-սարան է: Ավոն, չնայած իր վի-ճակին, փորձում է ամեն գնով պահպանել 44-օրյա պատե-րազմից հետո մնացած Արցա-խը: Այնուամենայնիվ, Վաղոն հեռանում է Արցախից՝ իր հետ տանելով թոռնուհուն՝ Աստղի-կին: Մեծ ցավ է Տիգրանի հա-մար սիրած աղջկա՝ Աստղիկի հեռանալը: Եվ այս տխուր իրավիճակում հարևանների մոտ է գալիս Անուշը՝ ուրախ ճիշով՝ Արամը եկել է...

Սա է մեր ժողովրդի ճակատագիրը, ինչ-պես պիեսում է Վաղոն ասում՝ ուժեղի մոտ թույլը մեղավոր է: Ներկայացումն ավարտ-վեց չղաղարող ծափերի տակ: Բեմ եկավ նաև Կ. Քոչարյանը՝ արժանանալով ծաղ-կեփնջերի, ծափերի, զովեստի խոսքերի: Լույսի տակ արդեն երևում է՝ շատերի աչքե-րին արցունք կա, տխրություն, կարոտ, նաև՝ տունդարձի հույս: Հանդիսատեսների մեծ մասը հենց պիեսի մույն հերոսներն են: Զրուցում են Աստղիկի դերակատար Նինա Ալեքսանյանի հետ, որը բեմում խաղում էր՝ հիշելով իր մանկությունը հարազատ Հաղ-րուք քաղաքում: Ցանկանում է ճանաչված դերասանուհի դառնալ: Տիգրանի դերակա-տար Գևորգ Ստեփանյանը Հաղորդի շրջա-նի Տոլ գյուղից է: Կարոտով է հիշում անտա-

Արցախի բարբառը: Բացի մշակութային իրադարձություն լինելուց, այս ելույթները նաև առիթ են, որ արցախցիները մի տեղ հավաքվեն, շփվեն: Պիեսի հեղինակը



կարևոր թեմա է ընտրել, և առավել նշանա-կալի է, որ դերերում արցախցի, տարբեր սերնդի դերասաններ են: Բեմի և զգեստների նկարիչն է Մերի Սարգսյանը: Երգչուհի Հաս-միկ Պապյանն իր ֆեստիվալն էջում գրել է. «... Մեկ անգամ ևս կարող եք դիտել Կարինե Քոչարյանի «Սարից այն կողմ» ներկայա-ցումը, լսելու Արցախի քաղցր բարբառը, հիշելու անցյալը՝ չկորելով հայացքն ապա-գայից: Ձեզ հետ անպայման թաշկինակ վերցրեք... Հիանալի ներկայացում է մեր ինքնությունն ու հիշողությունը պահպանե-լու, գալիք օրերի հույսն ու հավատը չկորց-նելու մասին»:

Գրականագետ, երաժիշտ, թարգմանիչ Պրեմ Թյուրաբյանը «Սարից այն կողմ»-ի և հեղինակի մասին գրում է. «Գիտենք հատ-կապես նրանով, որ 2021 թվականի գարնա-նը, 44-օրյա պատերազմից հետո, Կարինե Քոչարյանը, տեղափոխվելով հետպատե-րազմյան Արցախ, ապրել է այնտեղ ինձ ամիս, Ստեփանակերտի Վահրամ Փափազ-յանի անվան դրամատիկական թատրոնում բեմադրել է «Երկնքից երեք խնձոր ընկավ» ներկայացումը՝ ըստ Նարինե Աբգարյանի համանուն վեպի: Այդ ներկայացումը ցու-ցադրվել է թե՛ Արցախում, թե՛ Հայաստա-նում, Եվրոպայի մի շարք քաղաքներում, Ռուսաստանում, Ամերիկայի Միացյալ Նա-հանգներում... Արցախը արդեն հայաթափ-ված էր ու մնացել էր սարերից այն կողմ: Եվ այսօր՝ Հայաստանում, նա Արցախի դերա-սանների հետ բեմադրել է «Սարից այն կողմ» ներկայացումը, որի հեղինակն ինքն է: Նա մորից խիզախում է, նա բացում է վա-րագույրը. քանի որ վարագույրները չեն կա-րող փակվել հրահանգով: Պատմության, կյանքի, ճակատագրի, ողբերգության էջերը չեն կարող փակվել հրահանգով, ըստ «հար-մարավետության»: Արվեստն ու թատրոնը հարցեր ու պատասխաններ են փնտրում՝ սարի այս կողմում, սարի այն կողմում»:

Արցախցի բանաստեղծուհի, ՀԳՄ և ԱԳՄ անդամ Սոմա Համբարձումյանը «Սարից այն կողմ»-ը համարում է պատմամշակու-թային ներդրում «Մունք» մշակութային ՀԿ-ի կողմից: ««Սարից այն կողմ» թատերական դրաման չսպիացող հուշ է և ապրելաձև, մտածելակերպ, որի ժամանակ հանդիսա-տեսը տեսնում է այն սերը, ցավը, կարոտը, խռովքը, որն ունի իր մեջ Հակարիի կամուր-ջը ֆիզիկապես հաղթահարած յուրաքանչ-յուր հայ...», - գրում է մույն ճանապարհով անցած բանաստեղծուհին:



րոտ է հիշեցնում. կարոտ՝ կորսված հայրենի հողի, կարոտ՝ անմահության ճամփան բռ-նած հերոսների... Եվ այս հնչյունների տակ բեմում արցախցի դպրոցականներ են՝ Աստ-ղիկն ու Տիգրանը, որոնք ունեն հերոսաբար նահատակված ծնողներ, հարազատ, բարե-կան: Իսկ Արցախյան առաջին և վերջին պա-տերազմներում գրեթե բոլոր տղամարդիկ էին մասնակցել, ու շատ ընտանիքներում կային Անմահ հերոսին, հերոսներին նվիր-ված անկյուններ: Տիգրանը, որի հայրը՝ նկարիչ ու բանաստեղծ Ավոն (դերում՝ Մա-րատ Դավթյան) 1990-ականներին վիրավոր-վել ու զանված է սալակին, իսկ մայրը մահացել է քաղցկեղից, հարուստ գիտելիք-ներ ունի եւ սիրում է Աստղիկին: Ինքն ու հայրը մնացել են Շուշան տատի խնամքին: Արցախցի՝ իր ընտանիքին, բնակավայրին նվիրված ու խորհրդատու տատի-բաբոյի դերում խաղում է Ռուզան Գասպարյանը: Աստղիկի հայրը հերոս է՝ անմահացած Ար-ցախյան առաջին պատերազմում: Մայրն էլ է մահացել, և Աստղիկը խանութպան պապի՝ Վաղոյի (դերում՝ Սամվել Եվրիյան-Արցախի վաստակավոր արտիստ) խնամքին է: Երի-տասարդ սերնդի այս ներկայացուցիչները հպարտ են իրենց հերոս հայրերով, հայրե-նիքով: Բայց այլ է իրողությունը. գնալով սեղմվում է օդակը: Անհայտ է մնում Արցախի ապագան: Երկար ժամանակ հույսով նշա-նածին է սպասում երիտասարդ, հարսի սպի-տակ զգեստով Անուշը (դերում՝ Էդիտա Բա-բայան)՝ հավատով, որ տուն է գալու 44-օր-յա պատերազմում անհետ կորած նշանածը՝ Արամը: Հավատում է Անուշը, հարևանների կարծիքն է հարցնում՝ ասելով՝ նոր էին նշանվել... Պիեսում հերոսներից Մարիամի (դերում՝ Օֆելյա Մարտիրոսյան) ամուսինը՝ Էդգարը, զոհվել է պատերազմում: Վիշտը սրտում բնակվում է Վաղոյի խանութի



ռապատ լեռների թիկունքում գտնվող մելի-քանիստ իր գյուղը: Երբ բնակվում էի Արցա-խի Քաշաթաղի շրջկենտրոն Բերձորում և աշխատում կրթության ու մշակույթի համա-կարգում, հաճախ էի Ստեփանակերտում շփվում մշակութային գործիչների հետ կամ նրանք էին գալիս Բերձոր: Այդ ժամանակնե-րից են ճանաչել ու մտերմացել պիեսի հե-րոսների դերերում խաղացող դերասաննե-րից՝ Վլադիկ Միքայելյանին, «Արցախի այա-ներ» ազգագրական խմբի անդամ Ռուզան Գասպարյանին, Սամվել Եվրիյանին, ու մեծ կարոտով ենք հիշում Արցախյան օրերը: Այ-սօր բռնի տեղահանված արցախցիների հա-մար շատ է կարևոր, որ Երևանում, ինչու չէ, նաև մարզերում հաճախակի տեղի ունենան արցախյան մշակութային խմբերի ելույթ-ներ: Ու շատ է կարևոր, որ մշտապես հնչի

ԶԱՊԻԱՑՈՂ ՎԵՐԷ

ԲՈՆԱԳԱՐՈՑ

2023 թվականի սեպտեմբերի 19-ից

Արցախի դեմ Ադրբեյջանի սանձազերծած լայնածավալ ռազմական ագրեսիայի հետևանքով տեղի ունեցավ հայ բնակչության բռնագաղթը եւ էթնիկ զտումը: Շուրջ 115 000 արցախահայեր ստիպված եղան լքել իրենց հայրենիքը եւ տեղափոխվել Հայաստան: Տեղահանման ակտիվ եւ հիմնական փուլը սկսվեց 2023 թվականի սեպտեմբերի 24-ին եւ տևեց մինչև հոկտեմբերի 4-ը: Ավելի քան 9 ամիս շարունակվող շրջափակումից, սննդի, դեղորայքի պակասից եւ սեպտեմբերյան ռազմական գործողություններից հետո խաղաղ բնակչությունը հայտնվեց էթնիկ զտումների եւ ֆիզիկական ոչնչացման ուղղակի սպառնալիքի տակ: Հազարավոր մարդիկ Հակա-րի կամրջով անցան Հայաստան՝ անմարդկային պայմաններում ոտքով կամ մեքենաներով հաղթահարելով տասնյակ կիլոմետրեր:

Ավտոշարասյունը ասես դանդաղ սողում էր լեռնային գալարապտույտներով. այն ձգվում էր մի քանի տասնյակ կիլոմետրերով: Մի մասը արդեն գտնվում էր Հայաստանի սահմանին՝ Կոռնիծորում, իսկ շարունակությունը դեռ Ստեփանակերտի մերձակայքում էր: Իրար հրմշտող մեքենաների խիտ եւ կիլոմետրերով շարքը մահվան թափորի պես տխուր էր: Հարազատի մահվան հետ համակերպված՝ թաղման արարողությունից հետո հոգեհացի գնալու զգացողություն էր...

Սովորական դեպքում փոքր ավտոմեքենան կանցներ այդ շուրջ 80 կմ-ը առավելագույնը 2 ժամում: Երեսուկվեց ժամ տևեց Ստեփանակերտից այդ չարաբաստիկ անցակետ հասնելը: Դա բոլոր իմաստներով տարօրինակ ավտոշարասյուն էր: Ամենատարբեր մեքենաների շարան. մեծ բեռնատարները, տրակտոր-քարշակները ճնշում էին թեթև բեռնատար ավտոմեքենաներին, որոնք ստիպված էին անընդհատ արագ արգելակել կամ պահել ծախ ու աջ (եթե, իհարկե, դա հնարավոր էր), որ չվերածվեին մետաղաջարդոնի կամ չհայտնվեին անդունդում: Բոլորի վերելում սպառնալից կախվել էին վերաձբարձ կռուկներ՝ ծալած սլաքներով, որոնք լրացուցիչ դժվարություններ էին հաղորդում շարժվելու համար: Մինչդեռ այդ անսովոր շարասյան մասնակիցներից ոչ մեկը չէր ուզում խանգարել կամ վնասել երթին, չէր կոպտում անհարմար երթևեկի համար. հակառակը, բոլորը՝ թե՛ խոշոր բեռնատարների, թե՛ վերաձբարձների եւ թե՛ թեթև մարդատարների վարորդները ձգտում էին զիջող ու հանդուրժող լինել խախտումների հանդեպ, հատկապես որ որոշ ավտոմեքենաների ղեկին դեռահաս-

ներ էին, որոնք չունեին վարելու բավական փորձ եւ բնականաբար նաեւ՝ իրավունք:

Այդ շարասյան մեջ բոլորը հավասար էին: Բոլոր մասնակիցներին այժմ միավորում էր մեկ աննախանձելի ճակատագիր. տասնյակ հազարավոր մարդիկ ստիպված լքում էին իրենց հայրենիքը եւ ինչ-որ ուժով օժտված՝ շարժվում էին դեպի անորոշություն, որը նախընտրելի էր, քան նրանց գլխավորելու ծառացած մահվան իրական վտանգը: Չնայած մահը բաց չթողեց նաեւ տեղահանման ճանապարհին: Ոչ բոլորի սիրտն էր կարող դիմանալ: Որոշ ավտոմեքենաներով փոքր երեխաների հետ տեղափոխում էին նաեւ ծածկոցի մեջ փաթաթած ընտանիքի անդամի անշնչացած մարմինը...

Սողացող ավտոշարասյունը ասես ժամանակի չար մեքենա լիներ, որը անդարձ տանում էր մեզ հեռու, թվում է թե մեր այսքան մոտիկ անցյալից, որտեղ մնացել են տարիներով վաստակած մեր ունեցվածքը, խնամված այգիները, սիրելի զբոսայգիները եւ փողոցները, մանկությունը, երջանիկ կյանքը եւ հարազատների գերեզմանները: Անհայտ էր, թե ինչ ապագա էր սպասում շրջադարձից այն կողմ...

Ստիպված էինք գիշերը նույնպես անցկացնել մեքենաների մեջ՝ աստղալից, սառը երկնքի տակ, որն անտարբեր էր ներքեւում կուտակված մարդկային ամփոս վշտի հանդեպ: Լուռ սպասում էինք, թե հերթական կանգից հետո երբ պիտի սկսենք կրկին շարժվել: Մոտակա կիրճից միայն լսվում էին շնագայլերի ոռնոցները, ասես երեխաներ էին լացում... Գաղթի դժոխսային ճանապարհ եւ նույնքան դժոխային ապրումներ... Լացելու էր...

Հազիվ լուսացել էր, երբ պետք է արդեն առաջ շարժվեինք, բայց դեռ կես կիլոմետր չանցած՝ նորից ստիպված էինք կանգնել: Բնական կարիքները հոգալու համար մարդիկ իրար քողարկում էին ծածկոցներով՝ անմիջապես ճամփեզրին: Իրարից ջուր էինք խնդրում, դեղ կամ այլ մի բան, բայց ոչ՝ հաց: Հացն արդեն այլ գին ուներ բոլորիս համար: Ի՞նչ ամիս հացի էն այլ հերթերում կոփված արցախցիներիս վերջին հերթն էր՝ Հայրենիքից հեռանալու հերթը, որտեղ վերջ չէին հարցնում: Փրկվել էր պետք: Խոսակցություններ էին հասնում, թե անցակետը ժամանակավորապես փակել են, դրա համար էլ խցանում է: Մեկ այլ գրույցում ասում էին, թե մեքենա է վառվել առջեւում, այդ պատճառով է խցանում: Ցավալի էր նայել ճամփեզրերին թողնված վառվող կամ ջարդված ավտոմեքենաներին, որոնք շարժմանը զուգընթաց ավելի էին շատանում:

Շարժվում էինք ու կանգնում:

Երեկոյին մոտ հեռավոր տեսահորիզոնում երեւաց անցակետը՝ դիմացը կուտակված երկար գծով մեքենաների շարանով: Ակնհայտ էր, որ մարդկանց ու ավտոմեքենաների պարունակությունը մանրագնին ստուգում են:

Հասանք Հակարի:

Անցակետում մեր ավտոմեքենան դիմավորեցին երկու սպա՝



սահմանապահի համազգեստով ադրբեյջանցի եւ ռուս խաղաղապահ: Նրանցից յուրաքանչյուրը բարեւեց իր լեզվով: Ընդգծված քաղաքավարությունը չէր կարող քողարկել ադրբեյջանցիների չարախիմը, զոհունակ հայացքները: Գլխաքանակի պես մեզ հաշվելուց, փախստականի մեր իրերը սկանավորելուց հետո թույլատրեցին անցնել: Այն միտքը, որ մազապուրծ փրկվելու համար պետք է շնորհակալ լինենք, բարոյապես ոչնչացնող էր:

Սոված, անքուն, հոգեպես հալունաշ եղած՝ ոտք դրեցինք Հայաստան: Կոռնիծորում մեր հայրենակիցների՝ մեր հանդեպ ցուցաբերած հոգատարությունն անչափ հուզիչ էր, կյանք վերադարձնող: Շնորհակալության խոսքեր դժվար է գտնել... Երբեմն հույզերն ու ցավն այնքան շատ են, որ բառերը լռում են:

Լուսացրինք Տեղ գյուղի մերձակայքում՝ կրկին ավտոմեքենայի մեջ, մինչև փոքր-ինչ ուժ կհավաքեինք Երեւան հասնելու համար: Տեղ գյուղի խայտաբղետ, առատությունից ճայթող մարկետը մեր աչքի համար անսովոր էր: Բլուկադայի օրերին քաղցրավենիք շատ էի կարոտել, բայց ամաչում էի քաղցրին կարոտ երեխաների համապատկերում որեւէ կերպ արտահայտել իմ՝ հասուն մարդու քաղցրի կարոտը: Գիտեի, թե խանութում քաղցրեղեն տեսնելուն պես իսկույն կիլոգրամներով գնելու էի: Սակայն երբ մտա խանութ, ապշել էի առատ ընտրությունից, չէի կարողանում կողմնորոշվել, թե ինչ է պետք գնել: Խանութից այդպես էլ քաղցրավենիք չգնեցի, բավարարվեցի այն մի քանի կոնֆետով, որոնք հացի եւ այլ սննդի

հետ տոպրակի մեջ Կոռնիծորում տվել էին մեզ: Գիշերային մթության մեջ հայերեն խոսք լսելով՝ հանգիստ շունչ էինք քաշել: Ավելորդ ժամանակ չծախսելու համար, որ առանց այն էլ քրքրված մասնակիցներով շարասյունը կրկին չկանգներ, մեր հայրենակիցները սննդով տոպրակը ավտոմեքենայի պատուհանից մերս էին

կյանքը սիրող, արժանապատիվ մարդուն, բայց շատ ջանքեր են պետք կյանք վերադառնալու, փախստականի կերպարը թոթափելու, նոր միջավայրին հարմարվելու համար...

Բռնագաղթության մասին ամենամեծ թյուրիմացությունն այն է, որ ժամանակի ընթացքում կհարմարվես: Ոչ: Անգամ տասը տարի հետո դու կարող ես մնալ «ակցենտով խոսող» մարդը, որը երբեմն բառեր է փնտրում, չի մեծացել տեղական կատակների վրա եւ մշտապես մնում է մի փոքր «օտար»:

Գաղթականի ցավը միանգամից չես զգում: Առաջին ամիսներն անցնում են վազվզուքի մեջ՝ փաստաթղթեր, բանկեր, կացարանի փնտրտուք, աշխատանք, ոճանք՝ դպրոց ու մանկապարտեզ... Դու այնքան ես զբաղված խղճուկ գոյությունդ պահելով, որ գրեթե չես հասցնում կարոտել: Սակայն աստիճանաբար սկսվում է կարոտը: Եվ հենց այդ ժամանակ է սկսվում այն, ինչին նախապատրաստվել հնարավոր չէ: Հանկարծ հասկանում ես, որ այլեւս չես հիշում քո քաղաքի տուն տանող այն ճանապարհը, որտեղ մեծացել ես: Սկսում ես շփոթել փողոցների անունները: Չես կարողանում հիշել, թե ինչ էր տեղակայված հարազատ վայրի այն խանութի կողքին, որտեղ գնացել ես տարիներ շարունակ: Բայց հիշողությանդ մեջ մնացել են մի ժամանակ գնված տեղաշորի նոր կոմպլեկտը, գեղեցիկ սպասքը տոների համար, բաժակները, որոնք պետք է դառնային ապագա կյանքի մի մասը... Եվ հասկանում ես, որ այն կյանքն այդպես էլ չապրվեց: Այդ ամենը մնացել է այնտեղ՝ գուցե մեկին ուղի է գնացել եւ ինչ-որ մեկն օգտագործում է այն, իսկ միգուցե ոչնչացվել է շատ ավերված բաների պես, թե՛ մինչև հիմա իր տեղում է, մեր բնակարանում, որտեղ, սակայն, հնարավոր է, որ մենք այլեւս չգնանք:

Ամենածանր բռնագաղթելու մեջ իրերի կորուստը չէ, այլ՝ որ աստիճանաբար անհետանում է այն վայրը, որտեղ դու յուրային էիր, իսկ քաղաքականությունն այնպես է անում, որ անգամ որոշ գրույցներ դառնում են անհնար: Ծանր է, որ չես կարող նստել ավտոմեքենան կամ տոմս գնել ու պարզապես վերադառնալ: Հետդարձի ճանապարհ չկա: Բայց այստեղ էլ տեղացի չես: Հավանաբար բռնատեղահանության ամենաբարձր գիճը ոչ թե իրերով ու գումարով, այլ մեր սեփական պատկանելության մի մասով վճարելն է, եւ այն զգացողությամբ, որ աշխարհում գոյություն ունեն մի վայր, որտեղ պետք չէր բացատրել, թե ով ես դու:

Սոնյա ԱՎԱԳՅԱՆ

ԻՐԱՊԱՏՈՒՄ

Ամայլա ԳՐԻԳՈՐՅԱՆ



Գյուղը դատարկվում էր։ Իննսուներեքամյա Ալեքսանդր պապը, որ երբեք չէր ընկճվել և ոչ մի իրավիճակում իրեն չէր կորցրել, միշտ սթափ բանականությամբ էր քննել իրերն ու երևույթները, իրեն հատուկ փիլիսոփայությամբ մեկնաբանել աշխարհի բանը, այժմ շվարած սենյակի երկայնքով այս ու այն կողմ էր գնում ու քթի տակ թնթրում... Նա փորձում էր հասկանալ կատարվածն ու կատարվելիքը, հիմա ի՞նչ. ինքը պետք է լքի իր տունը, իր օջախը, ծննդավայրը, մի ամբողջ ժողովուրդ պետք է դառնա անտուն, անտեր, գաղթական... Թերևս սա ամենամահավանականն էր, որ երբևէ անցել էր նրա մտքով։ Անգամ 90-ականներին, ավելի քան չորս տարի տևած սարսափելի պատերազմի ժամանակ, չէր ընկճվել, չէր կորցրել իրեն, չէր պատկերացրել նման անդառնալի աղետ։ Իր ապու-պապերի հողից ո՞ր գնա, իր հազարամյա երկիրը թողած, իր պատկառելի տարիքն առած՝ ո՞ւմ դուռը ծեծի, ասի՝ ես ո՞վ եմ, որտեղի՞ց եմ, ինչո՞ւ եմ եկել... Մի մեծ խայտառակություն՝ չապված ու չսկված, չտեսված... Ապրած կյանքն այժմ մի գրոշի արժեք չուներ։ Նա իրեն ոչ թե պարտված՝ ոչնչացված էր զգում։ Ներսը լափու էր տալիս, չգիտեր՝ ինչ աներ։ Երանի մի բան փոխվել, երանի հրաշք կատարվեր։ Նայում էր ճամպուրակին, ախր ոնց տեղավորեր դրա մեջ իր ունեցածը, իր տունը, իր երկիրը, իր ապրած կյանքը...

- Զէ, զուլում է, զուլում... Ալեքսանդր պապն այն մարդկանցից էր, որ միշտ իրատես էր և նախապես հաշվարկում էր բոլոր փաստերն ու իրողությունները և անսխալ հետևություններ անում։ Դեռ խաղաղ էին օրերը, երբ զգուշացնում էր՝ ուշ թե շուտ թուրքը գալու է Արցախի հողերի ետևից, ռիսակալ թշնամին չի հրաժարվելու մեր հայրենիքը գրավելու մտքից։ Դրախտավայր է Արցախը՝ հարուստ հանքերով, ջրային պաշարներով, բերրի հողերով ու անտառածածկ տարածքներով։ Միշտ էլ թուրք-քոչվորները զավթում էին լավագույն տարածքները, պտղատու հողերն ու այգիները, գյուղերն ու քաղաքները, ուրիշ ազգերի ստեղծածը։ Մեկ դար առաջ ցեղասպանել ու հայաթափել են Արևմտյան Հայաստանը, ապա՝ Նախիջևանը... Տես, երբ են Դաշտային Դարաբաղը զավթել, հիմա էլ եկել է Լեռնային Դարաբաղին տիրանալու հերթը։ Գիշերային ցեղերն էլ զինվեինք ու ավելի շատ մտածեինք մեղ օրվա մասին։ Ուր է թե եղպես լիներ։ Իրականում պապի նպատակը շրջապատի մարդկանց ահաբեկելը չէր, և ոչ էլ բնույթով էր հոռետես, պարզապես պատմության պատգամը գերազանց էր յուրացրել, նաև՝ իր կյանքի փորձառությունից, թուրքին լավ ճանաչելուց։ Նրանց հետ կողք կողքի ապրել էր ողջ գիտակցական կյանքը խորհրդային համակենցության տարիներին։ Նախ, դեռ տակավին պատանի, սովորելու համար մեկնել էր Բաքու, ապրել մորաքրոջ տանը, որի հարևանները ադրբեջանցիներ էին, ապա որպես վարորդ՝ աշխատել էր ադրբեջանցի նախարարի մոտ։ Քաջատեղյակ էր նրանց բարբերին ու սովորություններին, անսխալ ճանաչում էր նրանց տեսակը, մտածողությունը, հոգեբանությունը, անգամ լեզվին էր տիրապետում, ուներ ընկերներ։ Երբ վերադարձավ հայրենի հաշեն գյուղ, աշխատանքի անցավ կոլտնտեսությունում նախ՝ որպես բեռնատարի վարորդ, ապա կոլտնտեսության լուծարումից հետո՝ գյուղապետի վարորդ։ Նրա մեքենայում մշտապես Օմար Խայամի գիրքն էր, որտեղից պարբերաբար մեջբերումներ էր անում։ Որքա՞ն իմաստնացած էին նրա զրույցները. ձորակի մարդիկ գալիս էին նրանից խրատ ու խորհուրդ հարցնելու։ Խոսում էր դանդաղ ու կշռադատված, ամեն մի խոսքը՝ համեմված ժողովրդական իմաստնությանը ու իմաստասիրական մեջբերումներով։

Ջարմանում էին՝ ոնց էր այդքանը հիշում։ Ալեքսանդր պապը շատ էր սիրում գիրք կարդալ, առավել շատ անհագ ընթերցում էր հայտնություն, հայ գրականություն, հայագիտությանը վերաբերող աշխատություն։ Կային գրքեր՝ «Իսրայել Օրին», «Գևորգ Մարգարետունին», «Մխիթար Սպարապետը», որոնք անընդհատ վերընթերցում էր։ Իր սեղանի գրքերն էին, ու սրբությամբ էր պահում։ Ինչքան էլ աշխատանքից հոգնած, ուշ գար, անպա-ման պիտի ընթերցեր։ Այդ արարողակարգը երբեք չփոխվեց մինչև կյանքի վերջը։ Կարդում էր երբեմն նաև առանց ակնոցի։ Մի անգամ Մոսկվա էր մեկնել ու իր հետ մի բացառիկ գիրք էր բերել՝ «Родословные тайны армянских князей»։ Ամեն օր ընթերցում էր ու վերընթերցում այդ գիրքը։ Այն հայ իշխանավորների մասին գաղտնիքներ պարունակող գիրք էր, բավական արժեքավոր։ Հատկապես ծնունդը հաճախակի էր վառարանի կողքին նստում, գիրքը վերցնում ու խորասուզվում տողերի մեջ։ Ընթառությունը դանդաղում էր, դեմքին մի տեսակ լարվածություն էր հայտնվում։ Եվ երբ հարցրել են՝ ինչու է Օրի կարդում, հատկապես, երբ տխուր է, պատասխանում էր. «Որովհետև երբ իմ մեջ աղմուկ է և անհուսությունը, Օրին իմն հիշեցնում է՝ մարդն է հողը պահում, ոչ թե պատը»։ Ալեքսանդր պապն ուներ իր ապրելու կանոններն ու փիլիսոփայությունը, որոնք տարիների ընթացքում դարձել էին նրա կենսակերպը։ Մնվում էր օրը երկու անգամ. չափավոր ու շատ դանդաղ, մանրակրկիտ ծամելով, հետև էր երկա՛ր խորհելով։ Ամեն բան չէր ուտում, ուտում էր միայն իր սիրած ուտեստներն ու կերակուրները, ամենից շատ սիրում էր տոլմա, խաչիլ, կուրկուտ։ Թեյ շատ էր խմում, վաղ քնում և վաղ արթնանում, ապրում էր բնության հետ հաշտ ու համերաշխ։ Միայն մի բանում էր աշխարհի հետ անհաշտ, որ թուրքը պիտի տիրանա իր ունեցվածքին, իր պապերի հողին, իր լեռներին ու աղբյուրներին, իր սրբատեղիներին... Համախափ հիշում էր այդ համակեցության տարիները, թե ինչպես էին ամեն օր ազդերները կովերն ու ոչխարները գողանում։ Ամենացավալին այն էր, որ իրենց քրտինքով ստացված գյուղմթերքի մեծ մասն ուղարկվում էր Բաքու, իսկ չարքաշ գյուղացիներին չնչին մասն էր մնում գոյատևելու համար։ Շատ անարդարություններ էր տեսել կյանքում, պայքարել դրանց դեմ, եղել է չափազանց ազնիվ, ինչի համար իրեն էին վստահում պատասխանատու գործերը։ Երբ սկսվել էր Արցախյան շարժումը, Ալեքսանդր պապը վտանգ էր զգացել, գիտակցել է, որ լավ բանի չի տանելու այդ ամենը, քանի որ ընթրստանում են չարիքի դեմ, որի դարավոր նպատակն է վերջ տալ հային ու Հայաստանը։ Շարժմանը հաջորդեց երկարատև պատերազմը։ Վիճակն օրհասական էր, 5-6 տարեկան թոռներին հարսի հետ ճանապարհեց երևան. հրամայել էին կանանց ու երեխաներին տարհանել, դրությունը ծանր էր... Որդիներն ու գյուղի տղամարդիկ առաջնագծում էին, թեժ մարտերում։ Ավագ որդին ծանր վիրավորվեց։ Գյուղը 9 գոհ տվեց։ Պատերազմը դեռ էր ավարտվել, երբ երևանից հարսը թոռների հետ եղբոր որդու զինվորական բեռնատարով, որով գնացել էր զինվածքները բերելու, վերադարձան Արցախ։ Երբ հասան Շուշի, այն ավերված տեսան, դեռ թանրծ ծուխ էր բարձրանում հրդեհված տներից ու շինություններից, ամենուր անապրք հրասայլեր ու գրահամբեքեքներ էին ճանապարհին, սևացած ու պայթած արկերի կտորներ էին թափված այս ու այն կողմ։ Հասան գյուղ, երեխաներին դիմավորողը Ալեքսանդր պապն էր՝ կնոջ հետ։ Աչքները ջուր էր կտրել, մինչ երեխաները կհասնեին տուն։ Օրեր, ամիսներ ու տարիներ գլորվեցին։ Հետո եղավ ապրիլյան քառօրյա պատերազմը, և էլի գոհեր, վիրավորներ, տարածքային կորուստ։ Չանցած 4 տարի՝ նորից պատերազմ սկսվեց։ 2020 թ. սեպտեմբերի 27-ն էր, կիրակի օր։ Ալեքսանդր պապը, սովորության համաձայն, առավոտ կանուխ արթնացել ու իջել էր այգուց հավաքած մրգերից օդի թորելու, երբ սկսվեց ռմբակոծությունը։ Սկզբից թվացել էր՝ որոտ է, բայց ի՞նչ որոտ, երկինքը լազուր կնքված էր, իսկ աշման արևը հաճելիորեն տաքացնում էր ցողաթաթախ հողը։ Չարաբաստիկ պատերազմի ծայներն էին, վա-

ղուց ականջին ծանոթ, որ չես շփոթի աշխարհում և ոչ մի ծայնի հետ. դղորդում էին երկիր ու երկինք, ասես աշխարհի վերջն էր։ Այսքան մոտիկ ու հուժկու երբեք չէին եղել իրետակոծությունները։ Թողեց բահն ու աճապարեց տուն։ Տնեցիներն արդեն խուճապահար դուրս էին եկել բակ և չգիտեին ինչ անել։ Պապն ուղղորդեց բոլորին նկուղ՝ հորդորելով պահպանել հանգստություն ու զգոնություն։ 90-ականներին թոռներին էր պատսպարել նկուղում, հիմա էլ՝ ծոռներին... Անօդաչու թռչող սարքերը երամի պես գրոհել էին կապույտ լազուրը և ռմբակոծում էին ամենուր, ուր տեսախցիկը ֆիքսում էր՝ կլիներ տուն, մեքենա թե գորամաս, վայրկյանների ընթացքում վերածվում էր մոխրի։ ...Իր մտքերի հետ կրիվ տալով՝ անվերջ ծզուկ էր ժամանակը, որպեսզի մի քանի վայրկյան ավելի մնար իր օջախում, իր կառուցած տանը, որը երկու անգամ քանդել ու վերակառուցել էր, առաջին անգամ քանդել էր իրենց հայրական փոքրիկ անշուք տունը, որն ավելի շատ հյուղակ էր։ Դեռ փոքր էր, երբ երագել էր մի օր այդ տնակի տեղը մի մեծ տուն կառուցել ու կառուցել է երկհարկանի գեղեցիկ առանձնատուն։ Ու երբ տեսել է, որ իր սրտով չէ, քանդել ու տեղը ավելի մեծն է կառուցել՝ մտածելով, որ մեծ գերդաստան են, բարեկամներն էլ՝ շատ, որպեսզի բոլորին տեղ լինի։ Մի ամբողջ կյանք է ապրել իր տանը։ Այդտեղ ծնվել, մեծացել էին չորս զավակներն ու թոռները։ Կինը՝ Մանյան, գյուղի բուժքույրն էր. բարի ու գթասիրտ կին, անչափ սիրված բոլորի կողմից։ Հիշեց, թե ինչքան հաճախ էին իր մեքենայով գիշերվա կեսին հիվանդներին հասցնում մայրաքաղաքի հիվանդանոց։ Այդպես էր պետք. օգնել մարդկանց, քանի կարող էս ու ինչով կարող ես։ Դա է կյանքը, մնացածը սուտ բան է։ Բա ողջ կյանքում տունտեղ դնես, ոսկոր ճաքեցնես, որ էսօր թուրքը քո տնից քեզ հանի՞, բա այսքան արյուն թափես, երկիր կառուցես, որ էսօր քարուքանդ անեն, արած-թողածը թուրքը գա վայելի՞, բա այսքան անարդար աշխարհ կլինի՞... Անողոր պատերազմը ծվեն-ծվեն արեց Արցախը։ Երբեք չի մոռանա, երբ ավտոբուսներով ծերերին, երեխաներին ու կանանց տարհանեցին երևան։ Երբեք իր տնից դուրս չէր գա, եթե չլիներ թոռների համառությունը։ Ճանապարհին, Հակարի գետ չհասած, թշնամին թիրախավորեց իրենց ավտոբուսը։ Հրաշքով փրկվեցին. ռուսներ ճանապարհի կողքին պայթեց, ու քիչ էր մնում՝ պայթյունի պիլիքից ավտոբուսը շրջվեր ծորը։ 44 օր տևած աղետալի պատերազմից հետո գոնե վերադարձան տուն, չնայած շատերը կորցրել էին իրենց տունտեղը, զավակներին։ Շուշին, Հաղուրը, Քարվաճաղը, Քաշաթաղն ու հարակից բնակավայրերը թուրքին են անցել։ 44-օրյա պատերազմում ավագ որդին Քռասնի-Կարմիր շուկա հատվածում ռազմագործողությունների ժամանակ կրկին վիրավորվեց։ Այս անգամ չորրորդ սերնդի գեների՝ անօդաչու թռչող սարքի ռմբակոծության հետևանքով։ ...Նորից սեպտեմբեր ու նորից պատերազմ։ Այս անգամ տեղե ընդամենը մեկ օր, բայց ամենադժուրակին, ամդառնալին։ Հանձնում էին Արցախից մնացածը՝ առանց արցախցու կամքն ու ցանկությունը հարցնելու։ Ալեքսանդր պապը, որ միշտ ուշիուշով հետևում էր լուրերին, մշտապես հույս էր պահում, որ մեծ տերություններն ինչքան էլ իրենց շահերն ունենային Ադրբեջանից ու Թուրքիայից, այնուամենայնիվ չէին թողնի, որ աշխարհի մեծագույն անարդարությունը տեղի ունենար։ ...Ստեղծի մեջ իրեն կորցրած՝ մոտեցավ պատշգամբին, խորը հառաչեց ու նայեց խոժոռված Սըրունանց սարին, որ բոլոր պատերազմների ժամանակ գյուղի վահանն էր, իր վրա էր վերցնում գյուղի վրա արձակած բոլոր արկերն ու զնդակները։ Նայեց աշնանային երկնքում հազած ծեր հսկային ու աչքերը խոնարհեց. ի՞նչ ասեր, նայեց աչ՝ Կըրասնի Շյորեն ու ավելի խորը հառաչեց։ Այդ դեղնա-կարմիր անտառի փեշին գյուղի հանգստությանն է, որտեղ ննջում են իր հարազատները՝ նախապապը՝ Թուրանց Վանին, պապը՝ Մովսեսը։ Հայրը՝ Վաղիմիրը, չկար, գերեզման չունեցավ, մնացել էր Հայրենական պատերազմում։ Հորեղբայրներն ու նրանց զավակները, մորական տատը՝ Շահուն աճին, մի տղամարդ կին, հիշում էր միշտ խլեղով՝ տա-

րագով, ծիու վրա նստած, որ գիշեր-ցերեկ աշխատել է աղջկա որբացած յոթ զավակներին մեծացնելու, ոտքի կանգնեցնելու համար, դռնաչաղ ու չարքաշ մայրը՝ Աստղիկը, վաղաժամ մահացած կինը՝ Մանյան, երեք եղբայրները. ավագ եղբայրը՝ գյուղատնտիկ նախագահ Նաիրիմանը՝ (ավանդույթի համաձայն՝ թուրքի անուն էին դրել, որ չմահանա, մինչ իրեն ունենալը մայրը երեք անգամ ծննդաբերել էր, բայց երեխաները մահացել էին) կնոջ՝ Փառանձենի հետ, Երեմը՝ իր կնոջ՝ Եփրաթայի հետ, վաղաժամ մահացած Սերգեյը՝ չորրորդ եղբայրը, որ տակավին երիտասարդ էր, անգամ ամուսնացած չէր, իսկ Արտյուշան մնացել էր հեռավոր միջին Ասիայում՝ Ուզբեկստանում, չկարողացան դին տեղափոխել հայրենի գյուղ, ավագ քույրը՝ Նատալյան, եղբոր քաղել տղաները՝ ավտոկարի գոհ դարձած, վաղաժամ մահացած Վիտալիկը, Վլադիկն ու կինը՝ Սվետլանան... Մի ամբողջ գերդաստան իրեն էին սպասում այնտեղ՝ հանգստարանում, հիմա ինքը ո՞ր գնա, հարազատներից հեռու ո՞ր հողում պիտի հանգրվանի... Յոթ զավակներից ինքն ու փոքր քույր Սվետլանան են մնացել... Երկուսն էլ տարիքն առած, երկուսն էլ դարձած գաղթական... Ախր այդպես ո՞նց կլինի, մարդկության, բնության մեծագույն անօրինությունն է, մեծագույն զարհուրանքն ու ռժրագործությունը մարդ արարածի հանդեպ... - Մարթին կյանքը ծանր պատմությունա-խորհում էր պապը,- ես պատերազմներն էլ իրենց հերթինքն աղ լցնում եմ մի թիքյա կյանքին ու ավելի դառնացնում։ - Դեղո, պղծոթ, քշաց հրդեյնք ինուս, թորքերը մտավ շենը,- ներքևից կանցեց թողը։ - Պա բենգինը՞ քըթալ,- հարցրեց պապը։ - Զէ, ճարալչընք, յէկ ճանապարհվենք, գուցե հղենքի մի լյուս ծաթյի,- գայրույթից ու վրդովմունքից թողը ծխախոտ էլ չուներ, որ ծխեր, գոնե ջղերը մի պահ հաղթանակային։ Վերջին անգամ երբ էր ծխել, չէր հիշում, ինքն ամիս չորսփակում էր, հացի խմորին էր օրհասական, հիմա նաև լինել-չլինելու խնդիրն է։ Ե՞րբ էր, որ ընկերներով ռուս զինվորներից շատ թանկ գնով մի տուփ սիգարետ գնեցին։ Երանելի պահ էր։ Երեկ բոլոր զինվորականներին հորդորել էին վառել իրենց զինվորական զբոսլյկներն ու շորերը, որովհետև եթե հանկարծ թուրքերը ներխուժեին տները, առաջինը հաշվեհարդար էին տեսնելու հենց պատերազմի մասնակիցների հետ։ Տասնհինգ տարվա զինվորական թողը, որ մասնակցել էր երեք պատերազմների ու 18 տարեկանից բանակում էր, չէր համակերպվում խայտառակության հետ, և եթե պապիկի ու հոր հարցը չլիներ, գուցե ինքը այլ կերպ վարվեր, մտքով ամեն ինչ անցնում էր։ Ամեն մեկն իր մտքերի ծանրությունից կուչ էր եկել հարապատ տան պատի տակ, ու այդ բեռով պիտի ճանապարհվեին, ապրեին այդ բեռան տակ։ Ապրեի՞ն, ինչպե՞ս... Պատերազմների, կորուստների, անորոշության, գաղթի երկար ու ծիգ սովերները փռվել էին նրանց կյանքի բոլոր մնացյալ օրերի վրա... Մեքենայի մեջ ընդամենը 2-3 լիտր վառելիք էր, հազիվ կբավականացներ մինչև Ատեփանակերտ։ Ամենածանր տնից դուրս գալն էր։ Ալեքսանդր պապը դժվարությամբ ու դժկամությամբ իջավ աստիճաններով, ասես ամեն քայլի հետ ուզեմար հետ քայլ անել, բայց իջավ ու մտավ այգի՝ իր տնկած ծառերին հրամշտ տալու։ Մեկ առ մեկ հիշեց, թե որ ծառի տնկին որտեղից էր բերել, տնկել, ջրել փայփայել իր զավակի պես, խնամել, որ մի օր բերք տա, ու իր թոռներն ու ծոռները վայելեն։ Ծառերի շվաքի ներքո ինքն իրեն ոչինչ զգաց. ծառը մնում է, ինքը գնում է։ Հիշեց, որ երկու օրից արտը պետք է հնձեին, աչքը ջուր էր կտրել, մինչ ցորենի հասկերը դեղնել էին։ Ապա մտավ գոմ, դուռը բացեց ու իր պահած պաշտած անասուններին բաց թողեց, իսկ հավերի առաջ տան եղած ցորենը շաղ տվեց ու առատ ջուր լցրեց ջրամանները։ Հայունաշ անող 9 ամիսներին մի հավ չմորթեցին՝ պահելով մեղ օրվա համար։ Շրջափակում էր, հաց չկար, ալյուր չկար, ամիսներ գլորեցին կիսատված, սոված... Է՛հ, կուպել չարժե, այժմ պարտվածի պես լքում են իրենց հայրենիքը։ Խոր ծերության մեջ ստիպված պետք է դառնա գաղթական՝ հեռանալով իր տնից, ծննդավայրից, քանի որ թուրքը ներխուժել է իր երկիրը, իր տուն, և նա է հիմա թե-լադորը։



ՄԱՐԶԱԿԱՆ

ԿԱՐԵՆ ՂԱԶԱՐՅԱՆԻ ՓԱՅՈՒՆ ՀԱՂԹԱՆԱԿԸ

Արցախում խառը մենամարտերը (MMA) լայնորեն տարածված ու զարգացող մարզաձևերից էր՝ շնորհիվ ճանաչված մարզիչ Գարեգին Աղաբալյանի ջանքերի: 2023թ. բռնատեղահանվելուց հետո Գարեգին Աղաբալյանը վերսկսեց մարզչական գործունեությունը Երևանում եւ ներկայումս նախագահում է Հայաստանի խառը մենամարտերի (MMA) ֆեդերացիան: Նրա ներդրած կազմակերպչական եւ մարզչական պրոֆեսիոնալիզմը, փորձը եւ նվիրումը մարզումները դարձնում են արդյունավետ ու ոգեշնչող, որի համար էլ հաղթող մարզիկների եւ մարզիչների կողմից նա արժանանում է առանձնահատուկ երախտանքի:

Օրերս Թախլանդի Բանգկոկ քաղաքում կայացած հառը մենամարտերի (MMA) One Championship մրցաշարում Հայաստանի ներկայացուցիչ Կարեն Ղազարյանը փայլուն հաղթանակ տոնեց: Սա անսխալեղ հաղթանակ էր մեր երկրի համար, քանի որ խառը մենամարտերի պատմության մեջ մեր երկրում ապրող, պարապող որեւէ մարզիկի դեռ չէր հաջողվել հաղթել այս հեղինակավոր մրցաշարում:

- Հանդես եկա 56 կգ քաշային կարգում: Սա պրոֆեսիոնալ մենամարտ էր: Մրցակիցս շատ փորձառու՝ ճապոնացի Հիսաշի Էզակին էր: Տեխնիկական նոկաուտով վաղաժամ հաղթեցի նրան առաջին ռաունդից հետո: Քանի որ դեմքի վնասվածք էր ստացել, հրա-

ժարվեց շարունակել պայքարը: Նա բավականին փորձառու մարզիկ է, բրազիլական ջիու-ջիյուի աշխարհի առաջնության փոխչեմպիոն: Խառը մենամարտերում ունեցել է 7 հաղթանակ՝ առանց որեւէ պարտության, հի-



մա արդեն դարձավ 7 հաղթանակ ու 1 պարտություն: Իսկ ես խառը մենամարտերում արդեն ունեմ 6 հաղթանակ եւ 1 պարտություն:

Զգացողություններս աննկարագրելի էին հաղթանակից հետո, ասես շոկի մեջ լինեի այդ պահին: Ամենաշատը հպարտության զգացողություն ունեցա: Հաղթանակս նվիրում եմ իմ հայ ազգին, հարազատներին, մեր զինվորներին, սա միայն իմ հաղթանակը չէ, այլ բոլորինս: Սա իսկապես մեծ հաղթանակ է իմ համար: Քանի որ իմ ծննդավայր Գավա-

ռում չկան պարապելու պայմաններ, դրա համար ես, հաղթահարելով այդքան երկար ճանապարհ, գալիս հասնում եմ մայրաքաղաք, որ մարզվեմ: Բայց երբեք չեմ ընկճվում, քանի որ հենց այդպիսի դժվարությունների շնորհիվ ենք մենք կոփվում ու հասնում նման տպավորիչ հաղթանակների: Շուրջ երկու ամիս պատրաստվել էի այս մրցաշարին: Հաղթանակով բարձրացավ իմ վարկանիշը դասակարգման աղյուսակում: Ինձ համար շատ մեծ պատիվ է, որ մեր երկրում առաջինն եմ ու դեռ միակը, որին հաջողվեց հաղթել այսպիսի հեղինակավոր մրցաշարում: Շնորհակալ եմ Աստծուն, հենց նրա ու իմ հավատքի շնորհիվ եմ հաղթել: Հատուկ շնորհակալություն նաեւ իմ անձնական մարզիչ Ստեփան Շահնուրադյանին եւ Հայաստանի խառը մենամարտերի (MMA) ֆեդերացիայի նախագահ Գարեգին Աղաբալյանին՝ մշտապես իմ կողքին լինելու համար,- ասել է չեմպիոնը:

Կարեն Ղազարյանը 2018-ին վրաստանում կայացած հառը մենամարտերի (MMA) սիրողական միջազգային մրցաշարում փայլուն հաղթանակ է տարել ադրբեջանցի մրցակցի հանդեպ՝ ընդամենը 13 վայրկյանում տեխնիկական նոկաուտի ենթարկելով նրան: Այս հաղթանակը եւս ամոռաճալի է նրա համար:

Կարենի անձնական մարզիչը՝ Ստեփան Շահնուրադյանը, մեկնաբանեց, որ One

Championship-ը համարվում է աշխարհի ամենահեղինակավոր մարտական կազմակերպություններից մեկը, որտեղ հանդես են գալիս MMA-ի, մուայթայի, քիքբոքսինգի եւ գրեվիլինգի լավագույն մարզիկները աշխարհի տարբեր երկրներից: Այն երկրորդն է UFC-ից հետո: Իր սան՝ Կարեն Ղազարյանի հաղթանակը պատմական է համարում, քանի որ Հայաստանում ապրող, պարապող որեւէ մարզիկ մինչ այս չէր հաղթել այս հեղինակավոր մրցաշարում: Կարենի հետ միասին երկար ճանապարհ են անցել, նրա առաջին տիտղոսը սիրողական MMA-ում աշխարհի փոխչեմպիոնությունն էր, որից հետո պրոֆեսիոնալ հարթակում հաղթանակ տոնեց GFC-ում, NAIZA-ում ու արդեն երկրորդ փորձից, ղժվար ու շատ կարեւոր հաղթանակ տոնեց One Championship-ում: Մարզչի խոսքով՝ Կարեն Ղազարյանին արդեն տարբեր տեղեր նկատել են ուզում են հրավիրել մենամարտերի արդեն չեմպիոնական գոտիների համար: Կարենը օժտված է կամային բարձր հատկանիշներով, շատ կարգապահ եւ կշռադատված մարզիկ է, որի հետ մեծ հույսեր է կապում մարզիչը: Առանձնահատուկ շնորհակալություն են հայտնում ֆեդերացիայի նախագահ Գարեգին Աղաբալյանին, որի ներդրումը շատ մեծ է մարզիկների գրանցած հաջողություններում:

Սոնյա ԱՎԱԳՅԱՆ

ՃԱՄՊՐՈՒԿԻ ՄԵՋ ԴՏԵՂԱՎՈՐՎԱԾ ԿՅԱՆԸ

7 Պապի մտքով ակամայից դրվագ առ դրվագ անցան հայոց պատմության ողբերգական ժամանակները, և խորը հառաջ քաշելով՝ հարցրեց՝ ո՞ւր ենք գնում: Մարդ էլ օրը ցերեկով իր տնից-տեղից գնա, ո՞ւր ենք գնում, ո՞ւր եք ինձ տանում: Մեզ արթնում են, սա արթո՞ւ է,- կոկորդի մեջ խեղդելով՝ արտաբերեց ու նստեց մեքենան: Սարսափելի էր զգալ ու տեսնել, թե ինչպես են թեզ ոչնչացնում, արծվից դարձնում անգոր ու թուլամորթ ճնճղուկ: Պապն անդադար մտքերի հետ էր, փորժում էր հիշողություններ, դեմ առ դեմ նստած էր իրենց հանդեպ իրականացված հրեշային ոճ-րագործության փաստի առաջ, անհուսալի ապագայի առաջ:

- Քու հյար շտեղա՞,- հարցրեց թռռանը:
- Քեցալա բենզինու հետա,- պատասխանեց թռռը՝ երկար հառաջ քաշելով:
- Դե տոռը՞ քլիդի,- արցունքների միջից արտաբերեց պապը:

Թռը կողպեց տան դուռը, ապա բանալիները զգուշությամբ դրեց գրպանի մեջ, որ հանկարծ չկորցնի: Միակ բանը, որ տանում են իրենց տնից, բանալիներն են: Մի օր գուցե ետ վերադառնան, տունը ավերված չտեսնեն: Թեպետ հոգու խորքում գիտեին, որ թուրքը ոչ մի կողպեքի չի նայելու, մտնելու են ու....

Որդին եկավ, սակայն դատարկածեռն, ոչ մի տեղ վառելիք չկա, եկավ ու հուսաբեկ նստեց մեքենան: Մի պահ հիշեց, որ հրաժեշտ չի տվել տանը, անգամ չի մտել տուն ու չի վերցրել մի հուշ, գոնե տաք վերարկուն, որ ցրտին ծածկվեր: Իրականում ոչինչ չէր զգում՝ ո՛չ ցուրտ, ոչ տաք, ընդարձացել էին զգայարարները, սառել էր ու կարկամել: Միտքն էլ չէր ընդունում աչքի առաջ կատարվող իրականությունը: Առաջ եկան կռվի օրերը... Պետք էր անխնա կոտորել դրանց, որ այսօր չգրկեին մեր տներից: Մինչ այսօր արկերի բեկորները մարմնում իրենց զգացնել էին տալիս, ցավեցնում, որովայնի վերջին երկու վիրահատությունների վերքերն էլ դեռ թարմ էին, բեկորները վնասել էին կենսական կարևոր օրգանները, բայց հոգու ցավից այժմ ոչ մի մարմնական ցավ չէր զգում, ասես մարմինը չկար, կար միայն վառված սիրտ ու պրկված, ցավազար ջղեր:

Մեքենան շարժվեց՝ ետևում թողնելով հաշենն իր դատարկվող տների ու ննջեցյալների

հետ միայնակ, վիզը ծուռ: Միակ կենդանության նշույլը որբացած շներն ու կատուներն էին, որ տների հետևից անհույս կաղկանձում էին՝ կարծես զգալով իրենց անտեր մնալը: Աշման արևը, որ բարձրացել էր գյուղի սուրբ Ստեփանոս եկեղեցու գմբեթից վեր, ասես անիմաստ շողում էր ու իզուր փորձում էր ջերմացնել ամայացող երկիրը, հեռացող մարդկանց ընդարմացած սրտերը, ասես հետ էր կանչում, երևի ուզում էր ասել՝ մի գնացեք, արտը հնձեք, բերքը հավաքեք... Մեքենան դանդաղ սլացավ Արուսյակի կամրջով դեպի անորոշություն...

Ստեփանակերտ տանող ճանապարհին զարմանալիորեն մեքենա գրեթե չկար, վերին գյուղերի բնակչությունը մի գիշերված մեջ դուրս էր եկել՝ ով ինչով և ինչպես կարողացել է. մեկը՝ մեքենայով, մեկը՝ ծիով, մեկը՝ ոտքով, անտառներով ու ձորերով: Վերջինն իրենք էին, որ ետ նայելով դուրս եկան: Գյուղը լքելու հրահանգի օրը Ալեքսանդր պապը չուզեց դուրս գալ. նախ դա գիտակցության մեջ չտեղավորվեց, և ապա ցանկացավ մի գիշեր էլ իր տանը քնել, գուցե հաջորդ օրը լույսը բացվելուց ինչ-որ բան փոխվեր: Հույսը չէր կորցնում, բայց առավոտյան եղավ անխուսափելի՝ իրենց հազար տարվա գյուղը պիտի թողնեին, թուրքերն արդեն մտել էին գյուղերն ու խոշտանգում էին ամզեն մնացած մարդկանց:

Արցախի ամենահին գյուղերից մեկն է Խաչենը, հնում Սելյուքներ՝ ուսուցչի գյուղ անվամբ: Հնամյա գյուղի մասին են պատմում 12-13-րդ դարերի խաչքարերն ու ավելի վաղեմություն ունեցող՝ գյուղի գերեզմանատան քարերի վրայի գրությունները:

Հիշեց Ղազարոս Աղայանի գերդաստանի գլխավոր Աղանց Վերդին, ով 300 տարի առաջ նույնպես ստիպված էր բռնել զաղթի ճանապարհը: Մեծ գրողը եղել է Խաչենում և իր աչքով տեսել Աղանց բաղն ու աղբյուրը, Աղանց ընկուզենին, որն այն ժամանակ մի չոր կոճղ է եղել: Ալեքսանդր պապը խնամքով էր ցանում Աղանց տափը և Աղանց ընկուզենու բարիքները հյուրասիրում ամեն անցվորի:

Մեքենան կանգնեց Ստեփանակերտի Մազի կամրջի մոտ գտնվող բենզակայանի մոտ, ահավոր հեթո՞ւ էր: Բոլորը սպասում էին վառելիքի: Ավելի քան 20 ժամ սպասելուց հե-

տո լիցքավորեցին մեքենան ու շարժվեցին առաջ: Մեքենաների հոսքն այնքան մեծ էր ու խիտ, որ երեք օր տևեց 4-5 ժամվա ճանապարհը: Մինչ կիսանեին Հակարի ճամբռին, որտեղ անցակետն էր, ու կանգնած էին թուրքերը, Ալեքսանդր պապը ճանապարհին վատացավ: Մի կողմից սարսափելի հոգեկան տառապալից վիճակը, մյուս կողմից անվերջ ձգվող ավտոշարասյունների հոգեհամ անող դանդաղ ընթացքն ավելի անտանելի էին դարձնում: Թռը դիմեց ռուս խաղաղապահներին՝ պապին փրկելու նպատակով: Գրեթե մեկ կիլոմետր ոտքով քայլեց դեպի ռուսական զորամասը և օգնություն խնդրեց: Դժվարությամբ համոզեց, որպեսզի զան ու պապիկին օգնություն ցուցաբերեն: Մեկ ժամ անց ռուսական շտապ օգնության մեքենան եկավ, բայց պապը ոչ միայն չնստեց մեքենան, այլև նրանց առերես մեղադրեց իրենց հետ կատարվող աղետի համար: Երկու ռուս զինվորականները, որ մեծ դժվարությամբ էին հաղթահարել ճանապարհը. վրդովված թողեցին ու գնացին: Հետևից կանայք աղերսեցին, որպեսզի իրենց երեխաներին կամ տարեցներին տանեն: Ձինվորականները նրանց խնդրանքին անհաղորդ մնացին:

Գաղթի ճանապարհը հյուծիչ էր ու անտանելի, նրանց աչքի առաջ վշտից ու սովից երկու կին մահացան. նրանց դիակները հանեցին մեքենաներից ու դրեցին ճանապարհի կողմակին: Շատերը վառելիք չունենալու պատճառով թողել էին նաև իրենց մեքենաները: Ամբողջական գյուղեր տեղավորվել էին բեռնատարների մեջ. գլխիկոր ծեր ու մանուկներ, կանայք ու տղամարդիկ հուսահատ կանգնած էին թափքին, և նրանց քարացած աչքերում վշտի անհունություն էր դաջված: Նրանք անգամ չգիտեին՝ ուր են գնում և ինչ է լինելու իրենց հետ: Կային մեքենաներ, որ այդպես էլ Հայաստան չհասան, ավտովթարներից կամ գլուղեվեցին ձորը, կամ ուղևորներով հրդեհվեցին:

Մեքենան դանդաղ մոտեցավ Հակարի կամրջին: Մի ամբողջ գորք էր կանգնած կամրջի աջ ու ձախ կողմերին, հերթով ստուգում էին բռնատեղահանվածներից: Հրամայեցին իջեցնել ապակիները, որպեսզի ավելի տեսանելի լինեին ներսում գտնվողները, վեց

թուրք զինվորական զլուխները խոթեցին մեքենայի պատուհաններից ներս: Մանրակրկիտ զննելուց հետո թույլատրեցին առաջ ընթանալ:

Անցնելով կամուրջը՝ հասան Գորիս, այնտեղից էլ՝ Երևան, ասել է թե՛ փրկվեցին: Հուզումներից, լարվածության, ջրածգման ու սարսափի փոթորկահույզ գրոհումներից հետո իրականության գիտակցումից մտախռով պապը ամբողջ մարմնով կուչ եկավ վարձու բնակարանի բազմոցին: Շուրջն ամեն ինչ օտարոտի էր, օտարություն էր փչում ամեն ինչից, բայց ինքն այլևս նրան էր պատկանում՝ այդ օտար ու խորթ միջավայրին, դեպի տուն վերադարձի այլևս ոչ մի ճանապարհ չկար:

Օրեր, ամիսներ գլորեցին երևանյան բնակարանում՝ կարոտելով իրենց օջախին, իրենց երկրին: Ալեքսանդր պապն իրեն հատուկ դիմադրողականությամբ դիմակայում էր անասելի ուժով ու գերմարդկային տոկունությամբ՝ ամեն օր իր տան կարոտից մաշվելով, բայց հոգու խորքում հույս փայփայելով, որ մի օր անայայնաորեն վերադառնալու է իր երկիր: Նա չէր ուզում այդքան հեշտ ու հանգիստ հանձնվել, անհետ ջնջվել, ոչնչանալ... Սակայն վիշտն ավելի ուժեղ գտնվեց և տապալեց նրան՝ մարելով պապենական հողում հող դառնալու միակ ցանկությունը:

Ժամանակ առ ժամանակ նրա հիշողության ծալքերում հառնում էին հրապարիչ ու դյուբող հայրենի գյուղաշխարհն ու նրա մարդիկ: Ամուններ էր արտաբերում, որոնք վաղուց չկային, հանգչում էին գյուղի գերեզմանատանը: Անվերջ խոսում էր գյուղի մարդկանց հետ, ասես, ողջ են և ներկա են, իր կողքին են ու զրուցում են երկրի անցուդարձից: Մի ուրիշ աշխարհում էր՝ իրեն հարազատ ու ջերմ: Գոհունակ ժպիտը դեմքին՝ ասես չէր ուզում դուրս գալ այդ աշխարհից...

Ամբողջ օրը ոչինչ չկերավ, երեկոյան թռը փորձեց կերակրել, բայց, իզուր, պապը ոչինչ չկերավ, ասաց՝ հետո: Հանգիստ ու խաղաղ քնով անցավ: Այդ գիշեր նրա աչքերն առհավետ փակվեցին: Տառապյալի դեմքն այլևս խաղաղ էր՝ հոգին վերջապես տուն էր վերադառնում:

«Գրական քերթ»
10/07/2026

ԼՈՒՍԱՐԱՐ ԽՄԲՎԳԻՐ՝ Ս. ԽԱԶԱՏՏՐՅԱՆ	Հիմնադիր՝ «Լուսարար» կրթամշա- կութային ՀԿ	✉ ք.Երևան, Անտառային փ. 188/16 ☎ 097-22-38-27 E-mail: gorcert@mail.ru: www.lusarar.info	Մեքերումների եւ փաստական տվյալների ստույգությունն ապահովում են հեղինակները: Թերթը ընթերցողների հետ գրագրություն վարելու պարտավորություն չի ստանձնում: Թերթը վաճառքի ենթակա չէ:	Տպագրվում է «Լիմուշ» ՄՊԸ տպարանում: Ծավալը՝ տպագրական 2 մամուլ: Տպաքանակ՝ 500 Ստորագրված է տպագրության՝ 29.07.2026թ.: